


止浦集

乾



止浦集序

我東文章早在碩麗朝不
為不感而凡其遺集布
行于世者甚鮮抑或於
有哀粹而失於兵燹終



致其實蹟泯沒不傳也
余嘗覽見東文選而尋常
慨恨於斯若止浦金公
之事即其一也一日公後
孫灑以公遺稿三冊來

示余之不覺見歎然而作
一繙閱而得知公益詳矣
公之生功在於宋之嘉
定祥興而歷事昭龜之
甲朝峻秩遐齡懿議

清裁甚見重於一處安
文成公裕與公講劄而
為道義交則可見公之
德業非比俗儒也元學
士王鶚稱公奏文而恨

未見面則可知公之詞
章卓實為華國也況在
竺教肆行夷俗未變之
時淺權臣之媚佛劾
妖宦之服胡者尤豈不

卓偉哉噫公之立朝徽
蹟因可徵於所履史誌牒
而為非博雅之士有難
盡識維茲詩文之編幸
出於累百載之後尚可

以使後人誦讀而知其蘊
矣若其詩之格調文之
體規有非憎陋所敢議
而竊謂當時所采王之所
稱稟東璧之精擅犀

京之手者至矣公編袞雖
少而各文俱存不甚寥
寥奚翅為一羽之珍一
膏之美也其所以擴撫
於散出之書精加校雠言

絕無踏駁者後商之誠
固皆勤矣而實始主張
者即公十八代孫東灝也
昔石潭李文成公撰公
雲孫某家文字有曰扶

安維金累善積功顯
清譽積之家法吁此實
推本溯源之論而於今
益可驗矣今將繡梓而
屬余以弁卷之文余以

彌錫興感者後不避佛
頭鋪卷其之譏而謹書之
如此云爾

崇禎後三乙卯季冬下
澣德殷宋煥筭其序

止浦先生文集目錄

卷之一

詩

七言絕句

分水嶺途中

一出塞

嘲圓覺經

落梨花

宣政殿行大藏經詩

上晉陽公詩二

中例消灾道場經講

文機障子詩

賀柳平章門生獻壽

迎主教坊致語詩

七言古詩

國家圖書館 NATIONAL CENTRAL LIBRARY TAIWAN R.O.C.

過西京

過鐵州

卷之二

應製錄

教冊

王世子王冊文

封王世子

元王祔廟竹冊文

除宰臣崔滋教書

麻制

表箋

告奏表

告奏起居表

賀新登寶位起居表

賀表上同

賀立元表

物狀

陳情表

物狀

告奏起居表

謝護送世子表

陳情表

告奏起居表

陳情表

告奏起居表

進奉鷓子起居表

進奉表上同

進奉表

進奉起居表

謝賜羊表

謝恩起居表

別紙告由表

賀正起居表

進奉表

進奉起居表

陳情表

方物表

陳情表

入朝告奏表

還國謝恩表

謝恩起居表

遣濟州星主告奏表

告奏起居表

詔責兵船陳情表

告奏起居表

陳情表

誅金俊告奏表

告奏表

告奏表

賀立大元國號表

賀表

謝釐降公主表

同前謝酒表

告奏表

告奏表

告奏起居表

賀表

物狀

賀聖節起居表

賀表

方物表

賀聖節起居表

賀表

方物表

讓國學祭酒侍講學士

元宗不允批答

讓監試試負

謝監試試負

讓知貢舉

代閔曦讓御史臺事

代柳璈讓承宣上將軍

同前謝承宣上將軍

代元傳讓翰林學士

同前謝翰林學士

代李藏用讓門下侍中

國家圖書館 NATIONAL CENTRAL LIBRARY TAIWAN R.O.C.

同前謝侍中

代尹克敏讓太子賓客

同前謝太子賓客

謝東宮賜宴箋

迎主教坊致語

卷之三

啓

上座主金相國傳衣鉢啓

疏

內殿行百座道場疏 洛山觀音慶讚疏

內殿行金經說經疏 萬德社法會疏

內殿請說禪文

書

與張學士書

與王學士書

又與王學士書

碑文

卧龍山真明國師碑銘

附

年譜

神道碑文并銘

止浦先生文集目錄終

國家圖書館, NATIONAL CENTRAL LIBRARY, TAIWAN, R.O.C.

止浦先生文集卷之一

詩

七言絕句

分水嶺途中

嘉熙四年庚子公以權直翰林充書狀官
如元有此詩及北征錄西京鐵州出塞等
詩

杜鵑聲裏但青山
竟日行穿翠密間
渡一溪流知幾曲
送潺潺了又潺潺

出塞

峽中盡日踏黃沙
橫擁氍毹冒雨過
山盡已疑胡



地盡地多還恐朔天多

嘲圓覺經

時舉國崇信佛法上下奔走要福之場權臣崔沆雕圓覺經令公跋之公不肯許作此嘲之沆怒曰謂我絀口耶遂左遷濟州判官

蜂歌蝶舞百花新
摠是華藏藏裏珍
終日啾啾說
圓覺不如絀口過殘春

落梨花

飛舞翩翩去却迴
倒吹還欲上枝開
無端一片黏
絲網時見蜘蛛捕蝶來

七言律

宣政殿行大藏經道場音讚詩二

一藏全勝百萬師
故應魔外不容窺
揀來龍象渾無畏
掃去豺狼更莫疑
晝講杵頭卷玉屑
夜談梭腹吐金絲
願王已輦千祥至
社稷昇平自可知
一會藏嚴是鷲峯
百爐香動瑞烟濃
講唇走玉翻三藏
譚舌飛珠演五宗
端信覺皇分着力
定教兵騎不畱蹤
龍天亦感宸誠切
導灑真泠醜國容

上晉陽公二

兩世波瀾定海東
泰山功後泰山功
菲分萬戶猶毫末
河潤三韓亦掌中
胡影不侵榆塞月
漢歌閑

倚玉樓風黑頭承相前應有綠髮封侯始見公
玉上無端點作痕已將名利負乾坤早年爭奈埋
塵土餘孽那堪及子孫金榜工夫誰見賞雪窓文
字未償冤可憐百歲升沉事決在明朝一片言

中例消灾道場音讚詩

遊空宿耀偶相干世眼無端作怪看若是被萌將
醞造當緣呪力旋消殘壽山更墨千年翠神杵纔
眷一粒丹熾盛光中添瑞氣臘前春色滿三韓

文機障子詩

一朵蓬萊湧海高銀宮貝闕駕靈鼈蘭燈燦爛蘋

虬卵羽葆參差翠鳳毛風護花奴頭上槿露濃金
母手中桃請看明月徘徊影應是姮娥望赭袍

賀柳平章門生李右丞尊庇領門生獻壽

令公桃李四番榮鸞谷當年薦壽觥座主座者邀
座主門生門見領門生三韓慶闕喧騶哄一代詞
林揔俊英更有罕聞竒事在矢來鞞帶得來呈

迎主教坊致語詩

我王曾爲活蒼生親屈龍沙萬里行北極風雲初
啓會東方日月更迴明笙歌滿國呈新喜劔佩趨
朝賀太平請見功臣歸羨處山舍萬壽湧崢嶸

七言古詩

過西京

今之平壤

扁舟橫截碧江水晚抵荒涼長慶寺悲詞輒欲吊
江山恐有神靈潛下淚憶曾負笈遠追師正見西
都全盛時月明萬戶不知閉塵靜九衢無拾遺如
今往事盡如掃可憐城闕空青草鋤犁半入英雄
居麻麥遍生朝市道採桑何處舊裙兒哀唱一聲
愁欲老

過鐵州

高宗十八年辛卯八月蒙古元帥撒禮塔
圖威新鎮屠鐵州倅李元禎固守力盡

遂焚倉舍領妻
子投火而死

當年怒寇闌塞門四十餘城如燎原依山孤堞當
虜蹊萬軍鼓吻期一吞白面書生守此城許國身
比鴻毛輕早推仁信結人心壯士嚙呼天地傾相
持半月折骸炊晝戰夜守龍虎疲勢窮力屈猶示
閑樓上管絃聲更悲官倉一夕紅焰發甘與妻孥
就火滅忠魂壯魄向何之千古州名空記鐵

山清集卷



國家圖書館, NATIONAL CENTRAL LIBRARY, TAIWAN, R.O.C.

止浦先生文集卷之二

應製錄

教冊

王世子玉冊文

忠烈王三年丁丑正月
壬寅冊子諒為王世子

云云王若曰尊繼體而重主器蓋欲延社稷之基
樹遺腹而朝委裘亦將固宗祧之本當立元良之
嗣用資監撫之權咨爾元子某雖居襁褓之中亮
有輪暉之表以三韓聖祖之內胤大元皇帝之外
孫歸啓謳歌喜已屬呱呱之泣繼文德業知不墮

顯顯之謨盍先崇名分之豐榮而早順生靈之後
望茲謹良辰之撰俾膺寶冊之加今遣某官某持
節備禮冊命爾爲王世子於戲作黃離而繼明乎
四方居蒼震而驚遠於百里迎賢左右樂忠正而
疎佞邪典學始終勤就將而保元吉克享春秋之
壽愷永符兆庶之瞻蘄不曰休哉

封王世子

世子諱公主所生生于忠烈王元年
乙亥九月丁酉至三年丁丑正月封

教蓋聞三王以來傳之子斯所以樹嫡立儲定宗
社之大本也予以不類忝承釐降於大朝曾未朞

年而得汝惟爾英明之稟早爲天命之所畀故知
三韓萬葉之慶將自爾復啓之也愛重之心既出
於天性况爾以皇帝之外孫應期而來情願所鍾
曷勝殫言茲庸寢興翹跂唯竢汝之旣冠耳若迺
雞鳴之問鵠舉之歌期以朝夕得聞肆於唇乳之
時已議封立則能不徇元良之望早令崇副貳之
儀耶矧今月良時吉萬福攸臻故特遣某官某云
云爾其岐嶷夙成克遂緝熙之美常念祖宗積累
之艱未作羣生久長之福其不躋歟

元王祔廟拾禮第三室加上尊謚竹冊文

忠烈王二年丙子七月乙未附元宗于宗廟十月乙亥親禘于太廟上謚冊

云云奉先惟孝既修通制之常追遠愈尊當舉懿稱之典恭惟顯宗云云聖烈大王應期誕作紹業重興天將啓聖以先艱雖未免錦州之駕道必涉危而後泰克復臨松麓之都申修典章肇峙城郭益有三韓無競之烈故為萬祀不遷之宗恭惟元成尊號太后金氏坤柔以正天作之配處鳩洲而習禮佐君子無險詖之心居鵲巢以積功思賢妃有敬戒之道助播休光於罔極遐傳慶業於無窮伏念臣猥以眇然忝于貽厥四載大邦之親拱幸

結新婚一朝先考之奄殂言還舊路痛意彌劇祥棊已經期當升耐於三年禮在合禋於十月筠編載美玉座揚芬謹以云云之奠加上大王尊謚云云王后尊謚云云冀諒誠虔優加眷顧有秩斯枯俾延宗社之靈長無疆惟休益擁子孫之繁行云云

除宰臣崔滋教書

高宗四十二年丙辰十月乙酉以崔滋為中書平章事四十五年戊午十二月壬寅以崔滋同中書門下平章事

夫王者之設官爵也若施層梯焉其引而高之以

置于巍級者必取其德識之宏遠功勤之確茂有以副具瞻之望者然後命之矣卿以命世之才摠文武之任轉籌制敵安社庇民使天下受其賜則朕獨不循僉議而有所蓄於慶賞耶噫金鼎太平之味朕將染指嘗之卿其努力而調沃焉

麻制

具官崔滋碩邁莊重醇篤裕和梅傳調鼎於四朝裳裳爲公輔器桂襲賜牋於七葉袞袞是文孫家博聞強記兮籠古單今長篇巨作兮策竒鞭妙然不挾才名之盛未嘗擡辭色之驕試翰鈴廳補官

壁水頗有積薪之歎而乃遷資於絳帳猶以貫笠之能而兼直署於紅綃講說解入頤詞疏動天意以制誥嘗遊於館閣其文章足瑞於朝廷重分洛邑之符牋表皆居於第一再放德輿之牘品題亦號爲無雙其或吏効之旣優也嘗游刃於登車武略之充贍也輒露鉞於制閫顧如斯確量之殊矣豈可以常勻而待耶當示異褒小孚僉矚所以靡踰數月連陟五階越於黃帶十年尋已到中臺之峻級向也青衫一紀却是儲前路之大榮若乃騁軺延譽於龍庭當軸納謀於宸極廟堂之駁論蜂

起也酌羣情而剗劃隣國之苛噴箭攢也側巨手而障除卿之誠其為朕悉輸朕之意亦於卿專注賞則但吾所有爵之宜極其高仍於朱網之巍司進以紫薇之貳職平章百揆何愧於裴張鎮撫四夷庶同於平勃可特授中書侍郎平章事餘並如故於戲殷王之德伊尹所染者漢室之功蕭何其搆之朕亦有期於仰成卿其無使彼專美祇服厥命勉其乃司

表箋

告奏表 見麗史

高宗四十六年己未三月壬子蒙古遣使車羅大來責王出迎又請太子入朝四月甲申王病篤甲午遣太子使奉表如蒙古叅知政事李世材等四十人從行

仁湧澤均地何嫌遠事直誠切天心賜憐云云竊念皇帝福蔭裏小拜具如前次使佐禮賓卿朴希實之往奏也常一作嘗有統兵之權臣又專提柄一作於國事落爾一作此指揮之內不自制焉故於應奉之間頗有一作多違者蓋皇帝之幸賴而兇豎之易除將萬世以為期罄一心而進一作盡力使逃竄海島之遺噍皆出居陸地以復舊一作比來入竄之遺俗皆相率嗟小臣老病既深亦皇帝所及知也肆今

出居於舊墟 上南集卷二 五一

日親朝不得令世一作子姑且往一作覲一作我兒身即

我之身我意即兒之意伏望照諒厥實一作冀陞下此意

採納其言更加字小之仁一作俾效輸忠之職

告奏起居表

海隅蓬艾之生別承恩眷天上風雲之會長入夢
魂靡獲奮飛但勤傾嚮

賀新登寶位起居表

元宗元年庚申三月丁亥蒙古皇弟忽必
烈即皇帝位四月丙寅遣永安公倍奉表
如蒙古
賀即位

恪守青丘厚沐漸東之化遙瞻紫極益殫拱北之

虔嘉與兆民切祈遐筭

賀表上同見
麗史

臣伏聞皇帝陛下今年三月二十四日新即寶位

受萬邦朝賀者千齡啓旦如日之升一作四海為

家受天之祐統臨所洎一作欣戴悉均一作恭惟

聖烈丕承神謀果斷修文偃革舞干羽于兩階發

政施仁湊梯航於萬國惟新景命益擁洪休伏念

臣祇襲藩封阻詣蟹朝之列向緣庭覲倍輸鰲抃

之誠

賀立元表

元宗元年庚申五月十九日蒙古世祖忽必烈立號中統元年播告本國九月遣右正言田文胤如蒙古賀立元謝賜符印甲子蒙古又改元為至元故遣使賀

祖功宗德跨五登三端本紀年從一至萬恭承鴻
號倍切慶悰云云念居東隅嘗事上國顧漢皇提
劍禮文之作未遑雖舜帝在衡正朔之頒蓋闕今
者皇帝陛下中天下而立統皇極以臨義取此而
改元名以之而覃遠四海一家之從令咸與惟新
三韓億載之効誠自今夏始

物狀

梯航萬國爭先庭實之輸蓬艾一區敢後山塵之

補前件物等堵地之產單裝所齎雖慙羞薦之微
尚冀悃誠之達

陳情表

元宗元年庚申四月丙午蒙使荆節等來傳詔慰諭甚厚同月庚戌遣太府少卿張季烈齎祝壽疏及方物如蒙古○其詔書略曰完復舊疆安爾田疇島嶼殘氓久罹塗炭窮兵極討殆非本心出彼滄溟宅茲平壤云

曲諭之辭自天方墮至仁所沐舉國更生拜讀已
還涕洟俱下恭惟寬以御衆蕩乎難名應天順人
膺萬國樂推之慶發號施令得四方咸仰之心念
言小國之保存世仰大邦之庇卹曾徒處於江海

豈所好哉實畏觸於干戈姑將免耳然上天之赫怒則焉往而可避故前歲之親朝也蓋爲乎子遺父曾卧病而忍辭身已涉海而聞計進退兩端之安決哀摧萬狀之莫言幸遭上聖之繼承適至中都而獲覲館于華邸迺昔皇親之所居時則新正命諸樂部而式燕賜之良馬副之寶鞍特推曠代之寵光仍示大明之憐察雀屋謂穿之巧說盡掃一邊鶴籠思出之孤蹤許還千里多般慰諭覓倍尋常故無恙而旋歸而曷勝於感戴纜及弊封之戾止又加明訓而榮之其詔云歸國立政永爲東

藩祇荷恩靈但增感悚當效覲王之度恪守任土之儀又詔云云島嶼殘氓久罹塗炭窮兵極討殆非本心况其斷自宸衷申命邊閫無以遁逃間執政無以飛語亂定盟惟事推誠咸使恕寬而勿問又言犯法俾無輕重而悉除此知其聖慈自然發於天性其出滄溟宅于平壤事具如上國官人之攸示方葺古京家舍而迺移而詔書又云亟正疆界以定民心我師不復踰垠矣大號一出我不食言則聖明此言木石猶感奚啻三韓之慶幸實爲四海之懽欣臣固當朝復暮暮復朝軫一心而

上海集卷之二
祇服子生孫孫生子誓萬世而奉供將令大例行
李以往陳先附元來使佐而稱謝區區之素萬萬
難宣

物狀

地則薄乎所恃中誠之厚天雖高也切希下聽之
卑前件物等時迫遠營使迴輕附冀荷寬容之賜
終諧仰戴之期

告奏起居表

常戀龍顏恨之奮飛之脩翼每承鳳詔喜同親炙
之耿光爰及使迴益殫宸祝

謝護送世子表

元宗二年辛酉四月遣太子謙入朝蒙古
賀平阿里孛哥九月癸亥太子還蒙主遣
侍衛將軍勃立扎禮部郎中高逸民等護
送其行三年壬戌四月遣判秘書省事朴
倫等如蒙
古進方物

屏息聿至使華偕來恭承稠沓之睿恩伏積慶抃
於愚抱伏念逖居東徼專戴上朝曾修鱗執之儀
諒迷曰極適值龍飛之際優荷撫矜三韓舉受於
生成萬祀唯期於報效昨令世子往覲宸庭方其
嚴陞之親趨示以至慈而深慰凡所敷奏實皆允
俞曰下詔云境上屯戍悉令卷還而又斷自己未

年二月已後被虜且逝者並令歸國至於陸地出排事姑從所便自度以為其多般撫字如此照情赫赫之聖嗣幸燭知於千里到骨深深之情懇當淪及於百孫况賜臣以殊常玉帶一腰又賜子以滿地金縷衣弓箭寶鞍等事兼及一行上下各賜金縷衣有差益知眷遇之尤豐實極銘藏而仰謝冀至罔之加卹俾永世以奉供

陳情表

元宗三年壬戌九月庚午蒙使劉憲等來索鷄子及好銅王遣禮部郎中高訥獻鷄子二十好銅六百七十二斤

臚介邁還華駢繼降香承明訓皆出至恩猶覩耿光實相深戀恭惟舞干舜德祝網湯仁宏創神都立中天而奄御廓開壽域毆萬國以咸躋言念殘封幸遭盛際爰暨遺黎之子爾復尋舊業以安然昨遣陪臣而往朝特蒙聖上之加卹凡所陳奏悉皆聽從慰爾以越分之榮光賜臣以殊常之服飾自惟父子若非親覲於比年詎向朝家方受厚知於今日緊曠度似憐兒醜故愚情如恃母慈豈專感戴於一心采切禱祈於萬壽節次使臣等奉傳聖旨以鷹鷄子奉納之晚為諭又勅以好銅二萬

斤進納其鷄子者早起時而探捕將底貢而養馴
其好銅者初觀詔旨而疑是赤銅及聽使臣則謂
之鑰鉅若乃鑰鉅顧下國鴨綠江內本非宜產而
得之惟上朝漢兒地中時或買傳而來此言何妄
飾世所共知然恐違聖勅罄時所有收集鑰鉅五
百七十二斤曾擬進鷄子二十箇白楮紙一百張
黃蒿紙一百張等差某職某隨上朝使佐前去奉
表進納伏望原實照情軫慈垂眷允錫洪休於遐
裔俾修薄賦於永年

告奏起居表

東曉受履幸千載之竒逢北闕馳誠惟萬年之切
祝爰及寒暄之近易夏期福慶之彌增

陳情表

元宗元年庚申二月壬戌衙內都兵馬錄
事陸子襄削髮投于蒙古囚于琬子襄父
及兄弟蒙主苛責甚煩三年壬戌十二月
丁卯遣郎中高訥以陸子襄及于琬妻子
如蒙古
陳情

圖書方降如親睿眷之臨綸音所宣諒非愚情之
望披承已往悚駭難安恭惟陛下冠冕百王襁褓
萬國一衣定天下集大統於周家尺劔八關中開
洪業於漢室既皇威之大振何頑寇之足虞而逆

賊李宣謂天可欺張臂敢拒爰命將而致伐不延時而就殲縱無露布之傳猶獲風聆之及四海同慶三韓最欣伏念臣緣幸昌辰恪居遠徼素加字小寬仁之廕悉允聲哀籲請之端繫聖德既深於撫矜率遺黎常與之感泣何嘗一念不祝萬年節次使介高泐之迴也拜勅稠重周邦震疊其詔曰所諭事段惡是何語實所痛心曾不意聖明之時有如斯嚴切之責回念眷憐有厚則易生譴斥忠敬無文則反致嫌疑今其至茲或者以此乃若子襄之妻孥也豈其違命而不遣劉憲之行李也初

未有制而俄傳輒自稟承尋即推究妻已適他而生一兒又且懷孕子雖無恙也有二箇皆爲孩提於使臣前方令召觀曰駟騎上不可偕往姑使養撫後當遣來我其安用而留之彼則不將而去耳乃以是而諭責甚可爲之兢惶又如于琰之妻子也雖非詔旨之并稱亦聽使臣之回報上朝高乙甫可多者史丞相等俱在於省而稟傳宣勅遂與其人而同諭送將故不敢違今此并遣恭惟皇帝陛下憐小邦常嚮內之無貳念前日幸遇上於不期萬有千年永示好生之德百無一數俾殫供職

之誠癸亥三月甲午高汭還自蒙古言中書省云帝怒爾國前降詔書內置郵籍民出師輸糧等事置而不奏故不賜回詔

告奏起居表

德綏四表誕敷光被之私忠欵一心常役戀思之夢屬觀鳳詔如覲龍顏

進奉鷓子起居表

元宗三年壬戌十二月乙卯郎中高汭還自蒙古蒙主頒曆又詔責玠禽之貢四年癸亥五月壬寅遣左正言郭如弼如蒙古獻鷓

日月照臨永荷皇明之無外雲霄瞻望但期聖壽之叵涯金石有渝肝腸何改

進奉表上同

隨方之賦用地所生享上之勤回物而達臣聞昔者越裳獻雉於周室條支貢鵠於漢家此皆盛德之所加而得遠人之咸服恭惟德邁千古道通九幽屬為侯度以豫遊宜備時畋之珍玩茲奉朝廷之約欲供鷹鷓之求夫是禽也曾入羅羅稍馴韉繼愧生地僻粗能掠兔於草間想借皇靈倘可搏鵬於天外伏望許容新翼於上苑并記舊栖於東陸永以尋常養鳥之恩移於終始字人之意

進奉表

應天而作廣覃涵毓之私任土所宜咸效奉供之
藝茲修薄贐敢忽常程恭惟大舜垂衣成湯弛畧
蓋輿八表曾不外於照臨航棧萬邦罄無前之貢
獻而小邦篤承聖眷異他方享儀實愧於菲微
服事惟貪於永久常擬一年之下賦將譬一塵用
培萬壽之南山夏高萬仞茲豈臣心之獨爾舉吾
民望以皆然

進奉起居表

大明委照于黃輿德絲無外荒服守封於蒼陸忠
款在中仰戴之專敷宣曷既

謝賜羊表

元宗四年癸亥十月壬戌遣大司
成韓祐如蒙古賀正兼謝賜羊

諄諄以言惠而好我泯泯其角賁然來思拜賜已
還銜恩莫任伏念臣邈居遐裔專戴天庥幸賴寬
仁粗保餘黎之有蠢常輸謹恪但期萬壽之無疆
比當賤价之迴爰有珍牲之錫維羣之數乃半于
千寵典出於無前感情臻於罔極此蓋伏遇得牧
人之術敦愛禮之心至或念於餽牽而許充於豢
養臣敢不仰慈為母庶同跪乳之恭循度奉君如
八麾肱之擾

謝恩起居表

曾親龍顏倍切尋常之懇每承鳳詔如親咫尺之威遐祝之勤大明是照

別紙告由表見麗史

元宗四年癸亥四月甲寅遣禮賓卿朱英亮郎將鄭卿甫等如蒙古奉表八月十七日甲子英亮等還自蒙古詔曰朕向見卿心之未孚故有責備之報今茲來復丐候生民稍集然後惟命辭意懇實理當俞允凡所言能踐與否卿其圖之仍賜羊五百

君親之義善貸不違臣子之情直陳無隱一昨使軺之旋返數条宸綍之奉傳其所謂置郵事雖則民殘而未孚為其詔諭而曾設至北境遽廬之相

屬如上朝行李之所監其餘并勅之多端亦欲應

時而並稟但緣遺噍初沐至仁蕭一作蕭然茂草之

間與野獸爭家而始集蕞爾編蓬之下猶江魚處

涸而相濡若當此時將籍其數顧惟蚩氓之嘗一作

常經患難恐昧法制而益積驚疑冀回厚眷一作

以徐觀俾有寧心而允濟抑又出師或有輸糧或有

餉等事干戈以後飢饉一作相仍民口之存者百

不一二一作土毛之斂者十無八九旄旆猶乏於

調發何以助六師一作之容晨夕尚艱一作於饗

殮詎能一作堪一作千里之饜設或忘已力之劣

而但迫皇威之加今不告實而苟欲其行後如失
期則何辭以對祇自增其譴責懼將負於生成進
退誠難一作悵惶罔措伏望曲加惻隱恕輿情而
不嚴優賜矜憐徇事勢而勿亟或云伏望下曲加
惻隱優賜矜憐為
上句恕輿情以不嚴徇事勢
以勿亟為下句未知孰是姑且置於大度之外
使自由於至息之中俟其民產之有恒漸爾土田
之爰闢然後惟命永示好生

賀正起居表

東文選目錄中此文下有公姓字及諱
字而本卷則不錄雖甚可怪姑存之

云云搏桑接境恭守職於漢藩行葦沐仁第輸忠

於周室爰屬履新之旦益殫倍舊之誠

進奉表

元宗五年甲子大司成韓就還自蒙古蒙
主賜西錦一段中統五年曆日一道夏四
月乙卯王遣禮賓卿金楛
延如蒙古謝賜曆日西錦

天臨有截之區誕膺千載日貢無疆之祝惟罄一
心恭惟重瞳燭幽四乳字小仰陶皇化雖萬國之
槩均淡沐聖慈獨三韓之斗別比日賤价方諗言
旋輒將曆日以播新俾授民時而敦本又明綸之
特降而瑞錦之斯頒祇承榮光曷勝感戴爰率常
程之課式修薄賦之儀謹差某官奉表獻納方物

兼進功德疏狀伏望俯賜矜容優加護卹令就安
生之業永觀述職之誠

進奉起居表

寅賓日出勉傾葵藿之心申錫天休想擁岡陵之
祚屬當輸貢彌劇效誠

陳情表

世受藩封常戴天臨之德歲修壤奠敢忘星拱之
誠雖罄無華諒慚不腆恭惟道則高矣文其煥乎
振提懷畏之心包括邇遐之望覆露疲薶萬方咸
得蘇腥洗雪煩苛一切務從寬簡念惟下國祇仰

上朝籲呼惟恃於至仁矜聽不速於凡事躋廣度
同於河海而小邦譬則鯤鯨卷收法網以優容將
觀自樂游泳恩波而喜躍已至相忘而臣居常蓋
我臣民泣且言於朝夕想於前日若非大聖之幸
逢噫與爾曹安有此時之胥保免罹兵革復就農
桑顧循已欲之如斯將謂何從而致者藏在臣心
之積感言裏難形祝延聖筭之專勤夢中尚窺謂
予不信鑒止有神今依年課之程粗奉土宜之贐
伏望許紆至懇殊軫深慈苟益旌於好生俾全蠢
蠢當永矢於供職爰及詵詵

方物表

造天雖遠槎靈猶上於銀河因地所生芹賤可登
於玉俎前件物等產從外園用寡內庭尚期有效
於塵禩庸許無淹於鑑納

陳情表 見麗史

元宗五年甲子五月庚辰蒙使胡都康和尚等來諭曰諸王羣牧今歲入朝上都卿宜乘駟來朝尚無濡滯已丑蒙使者先還以國子祭酒張鑑等伴行附表

華使鼎至疾於一作星火之馳璽書帶來諭以風
雲之會頒宣以徃蹈舞惟均一作伏念臣依蔭上
朝撫封東徼萬宇一作皆歸於覆燾仰化無遺三

韓別荷於矜憐銜恩罔極向一作嚮也躬察而將返

俄然語及於再朝而臣奏云退收一作離散之殘

民咸使出居於舊土訖有所定蓋徃乎來恭承嗣

訓以旋歸爰示一作小邦之形狀兵戈一作飢疫

之相壓三十年垂盡耗亾山海蕩流之子遺四五

載詎能招集完復經營或只有釐一字之靡一作

既往還使价之悉一作觀今被詔一作懲實增兢

悚有召不宜於俟駕應時一作當趣於騰塗一作

然而薄贄單裝亦豈殘藩之易辦遐程酷熱一作

亮非劣質之能堪方一作赴良一作辰謹一作朝

邃闕迺此私便之覬徇亦專恕卹之特一作優惟

冀至仁永加浚眷一作

八朝告奏表

上穹云遠切殫臣懇以倍馳北斗所臨猶想帝居而恒仰

還國謝恩表

元宗五年甲子八月親朝蒙古九月庚子王至燕都蒙主再親宴又賜宴中書省仍賜匹錦下及侍從臣僚已未王辭於萬壽山殿蒙主賜駱駝十頭十二月壬戌王至自蒙古六年乙丑春正月乙未遣廣平公恂大將軍金方慶中書舍人張鑑等如蒙古謝恩獻方物

往宗魏闕無前恩寵之過情還暨羣黎罔極感藏之淪髓襟袖將腐涕洟未乾伏念臣久荷聖慈虔供候服曾謂九霄之路邈矣難攀昨乘八月之槎忽然易到非至仁之專恃則安敢如歸於父母雖小國而親朝則尚能助顯於聖嗣繫一時之幸逢實萬國之同羨何圖睿眷屢出常鈞道途館待之既豐朝夕餼率之尤腆中都陌上許容鸞臈之朝萬壽山頭再賜鹿鳴之讌及其返也賜臣以衣帶鞍馬駱駝等事并牧羊人暨行李內陪臣衛卒皆賜衣襲有差又輟邇臣而為伴俾臨歸路以護行

凡所經由爛其委藉仰賴不貲之惠果能無恙而還豈惟受賜之一行感戴禱祝抑亦聊生之餘嘒顛倒懽欣今遣臣弟廣平公王某以臣歸國事由往奏宸所伏望陛下俯收報謝之微誠益置矜憐之羨化永副一心之望遐延億載之休

謝恩起居表

中國觀光如記勾天之一夢外藩貢祝但罄嵩嶽之三呼况屬春旗想增慶履

遣濟州星主告奏表

元宗七年丙寅十一月濟州星主來見同月甲子遣正言玄錫以星主如蒙古

一天無外四海在中雖尺地安敢自私故今日但期相率恭惟陛下馨德懷遠大明燭幽鉅細不遺道叶乾坤之涵毓遐邇胥悅息踰父母之庇憐夫濟州也元附小邦最爲漢島難名謫狀縱多慚蠻獠之風不隱忠誠庶偕沐聖神之化俾爾渠首朝于闕庭顧予專効以恪勤於此可垂其照亮

告奏起居表

鯨域守職仰陶聖德之熙熙龍陛馳誠恒祝皇齡之永永適屬賓王之際采增戀闕之懷

詔責兵船陳情表

見麗史

元宗九年戊辰三月壬申蒙古欲通使日本遣使于也孫脫來詔責請兵及船云云四月丙戌王餞蒙使于郊遣侍中李歲用從于也孫脫如蒙古上表

惟天爲大仰之常畏於下臨凡物不平鳴也必哀於上聽冀加矜卑永錫撫庥恭惟舜德重瞳湯仁一面戴高履厚熙熙六合之同風棧險航濶皞皞萬方之就日伏念臣嚮自親朝已後常蒙恕宥之深愛如赤子以示恩寬殊諸國樂與蒼生而安業專祝萬年一昨令臣弟而往宗多般以宸慈而罷慰還歸備叙感戴尤加而向件臣弟安慶公之迴來也以陸地出排等多端聖勅來傳所謂出排事

則積年之兵病所餘遺噍之保釐無幾非敢違於帝命實難保於臣心茅緣聖主之眷憐曲諒小邦之情實先諭之以量力後許之以從便益佩至仁常彈微懇凡此勅條之嚴重悉非疇昔之覲思曾謂平生幸依盛代如恃母子之偏護將不瑕於驕頑豈圖天意之忽移反令迫於狼狽悵惶因措籲列美窮但以陷過之人出言見疑構讒之地隨事生釁雖臣辭發於直實恐聖鑒謂之欺誣節次北京路總管子也孫脫禮部郎中孟甲等奉傳詔旨以去水就陸之晚爲諭且曰今方問罪於宋其所

助士卒舟艦自量能辦多小所輸糧餉就爲儲積
及達魯花赤戶版之事卿意謂何夫其就陸之事
則旣於古邑復其居而經營助師之事則雖是殘
民隨所有而檢備其辦舟艦輸糧餉事惟力是任
亦期將供其或請達魯花赤戶版事則方是出排
誠未暇於營葺候其畢就亦當從而稟裁乃若陪
臣海陽公金俊門下侍郎李藏用等賫表進朝事
侍郎李藏用則迺明訓之輒承偕使臣而前去海
陽公金俊則惟此都家之遷設爾其管領以指揮
且病痾忽作於老軀故跋涉難堪於遐路當候痊

愈卽令進朝而小臣須幹務旣成於出居以端由
將往而悉奏

告奏起居表

濟濟萬方之生齒無遠不宗熙熙千載之息肩自
今爲始適當華節之旋返倍貢葵心之向傾

陳情表

元宗九年戊辰六月己巳蒙古遣吾都止
來課兵及船八月遣大將軍崔東秀隨吾
都止如蒙古

誠切輸忠戴天常覲力微敵愾躋地罔安恭惟續
禹功高係湯德邁燭大明於萬國草創典謨鍾極

美於百王又安區宇頃屬寵臣之被名恭承明訓於助軍賤介甫迴王人繼至顧惟殘域元是褊陬雖在人民全盛之時未聞伍旅浩多之數况自辛卯而下二十年兵燹之相仍故於鴨綠以南百千狀耗亾之已甚幸遇聖明之寬撫許停征伐於比來惟茲編戶之子遺粗得農畦之復業其隸于兵衛者亦靡有戰卒而止是有名無實俾子頭已上不多入耳乃若戎行之充使元所未閑然猶帝勅之重違罄其時有自從都鄙爰泊旄倪計所調發則董可一萬人矣當俟命焉噫真實之辭反以矯

誣兢危之步動成蹉跌雖復載辭於萬紙豈盡愚情恨難捲地於三韓親經睿覽上意若知如此餘黎決不忍歟

誅金俊告奏表

元宗九年戊辰十二月丁酉誅金俊夷其族十年己巳正月癸丑誅其黨別將金昌世等六人庚申遣將軍康允紹如蒙古奏誅金俊

今有細故仰告因由者誠切終始於供職將輸萬世之勤事無大小以告王蓋在諸侯之誼伏念臣邈居海裔叨襲藩封但承厚卹於盛辰粗保子遺之殘俗竊以陪臣金俊樹乃私門之支黨畔其公

室之指揮務從便利於一身專逞侵漁於百姓常
稔包藏之志似懷逃竄之謀慮為何變於將來今
乃悉夷而既去倘爾屬之逋漏往或譖言惟我皇
之諒知即皆禁沮

告奏表

元宗十一年庚午六月己巳朔將軍襄仲
孫指諭盧未禧等領三別抄叛八月入據
珍島侵掠州郡九月甲辰以金方慶為逆
賊追討使與蒙古元帥阿海以兵一千討
珍島十一月己亥賊陷濟州十二月丁巳
金方慶與賊戰于珍島阿海恟懦不戰賊
圍方慶將軍楊東茂救之賊解圍去十二
年辛未正月己巳以阿海畏縮不救遣將
軍印公秀如蒙古以
奏帝免阿海職召還

畱兵制威頃仗皇威之無敵曠日持久盖由師律
之不臧茲貢忱辭仰干睿聽竊以憬彼逋黨棲于
遠洲至煩追討之官軍而許助揚於我旅惟茲戰
卒非不衆而不強且爾兇徒悉易降而易滅小邦
統軍叅知政事金方慶初戒舟師亟欲擊破而阿
海元帥誤聽歹人妄誘即執方慶送于王京其所
設備船兵及抄鍊軍人悉罷遣幸逢達魯花赤根
覈其實皆是誣枉尋即遣還方慶更備兵船徵集
軍人以去年十一月二十二日接戰我船百餘隻
對賊船三十隻惟方慶將軍楊東茂船先入力鬪

阿海便不相救却立觀變以故無成至今徒費罄
葛粟實所痛心凡應奉詔旨趨事人民皆詣兵所
肆欲速除其頑醜專令祇辦其勅條伏望云云其
向伴端由譯語金元器臨戰悉知冀垂採聽節次
將軍印公秀或云陳奏並賜昭亮

告奏表

元宗十二年辛未正月密城郡人方甫桂
年朴平朴公朴慶純慶祺等嘯聚郡人應
珍島賊乃殺副使李頤移牒郡縣遣其黨
殺清道監務林宗清道郡人詐降飲以酒
醉以殲之時密城人趙汗為一善縣令賊
各阡約與同叛阡從之尋聞其黨殲於清
道乃與郡人孫逸謀殺賊魁按察使李教
與金州防禦使金暉慶州判官嚴守安領

兵至阡等斬方甫等降賊遂平是月癸巳
官奴崇謙功德等聚徒殺達魯花赤及國
中在位者往投珍島隊正宋思均告變王
命將軍崔文一本曹子一鞠之又遣樞密院
事李玄原上將軍鄭子璵請救於脫朵兒
朵兒與洪茶丘等會宰樞捕崇謙等十餘
人按問皆服二月乙未朔崇謙等四人棄
市拜宋思均攝別將二月巳友遣上將軍
鄭子璵如蒙古告
方甫崇謙之亂

詔條曾稟於上朝有期必濟使節忽淹於中道豈
意徒還茲具事端仰干宸聽云云千齡啓業一視
同仁降黜綸於北宸遠馳四牡垂德餌於東海將
釣六鰲而年前上朝所遣日本國信使小邦護送
賤价某職某取正月某日騰裝行到尚州有密城

清道兩郡人等聞上朝兵馬繼來妄自疑懼宣言
誘檄于旁近縣郡曰雖皇帝實矜乎生靈乃國家
方困於師旅妻息尚被其攘奪資糧亦殫於斂徵
地非所觀豈可曉遺黎之昔兵若又至吾其爲幾
日之生於是擅殺官員肆惡橫行欲配于珍島之
逆賊頑嚚曷足道哉以故向伴使臣等僂不得前
去遽爾還來京中又有元來隸屬權臣家者崇謙
等某某人首謀叛國其辭亦如密城之人言欲往
從珍島逆賊而適有告之者卽請達魯花赤及使
臣忽林赤趙良弼王國昌洪茶丘并令陪臣等一

會推鞠皆伏其辜謀魁崇謙等悉肆諸市至於支
黨咸以決罪使百姓安居向伴密城清道逆賊其
界按察使方在金州卽與達魯花赤使者先到此
州者抄鍊道內州縣兵將進討之而密城等捕魁
謀逆于兵次兩郡人民亦已底寧茲令賤价某職
某往奏于天庭凡所控陳庶幾憐察

賀立大元國號起居表

元宗十二年辛未十二月己亥蒙古遣使
告建國號曰大元十三年壬申正月甲申
遣齊安侯淑樞密院副使宋
松禮如元奉表賀建國號

萬國同文屬千齡之盛旦一人有慶得四方之權

心茲擎庭賀之章庶效嶽呼之懇

賀表

見麗史

膺千載以紹先克嗣駿德首萬邦而居上新揭鴻名凡仰生成悉均蹈舞云云臣聞自昔帝王之立國號也三代以前則議德以制兩漢而下則因地爲稱繫先後沿革之不同迺彼此醇疵之或異恭惟皇帝陛下惟天所子以日爲兄偃武修文戢干戈而興禮樂創業垂統峙城闕而設班寮登崇峻良尊養耆耄崇大廟而閱笙磬鏗鏘之奏闢朝廷而講搢紳揖讓之儀淳化所馴遠人咸服茲廣輪

之無極諒載籍之未會西至竺乾北寤朔易尺地莫非其有一民亦匪所遺航泛東倭已聞越海而來附檄飛南宋當見向風而請朝若非畏愛之使然疇克懷綏之如此三靈叶贊二氣胥調天產淑祥甘露慶雲之滋至地供嘉貺醴泉神草之沓生履泰平之階登仁壽之域旣惟新於邦命須盡義於國容所以道不循常心無泥舊徇臣辟之率籲酌古今之宏猷而改國號曰大元三百有旬之成歲功自正朝而爲始六十餘卦之備易道從乾象而起初一言以興四德之長惟萬國之攸戴在百

王而莫高猗歟先正其名屬我大明之代巍巍盛
烈自開闢而無敢竝倫赫赫休稱與覆載而相為
終始寰宇一園之同慶車書萬國之畢臻伏念臣
生幸昌辰篤承異眷鳳傳景詔喜不外於海東鸞
賀誠心庶得先於天下

謝釐降公主表

元宗十五年甲戌六月癸亥元宗薨八月
戊辰忠烈王至自元己巳即位九月戊戌
遣齊安公淑知樞密事鄭
子璵如元謝釐降襲封

王姬方降國俗盡歡凡在瞻觀孰非抃躍伏念臣
浚緣宿劫生幸昌期四年入侍於宸庭萬邦爭美

之恩遇一旦連婚於皇息千古罕聞之眷憐仍許
襲藩旋令就國尋降肅雍之車服穩經遐遠之道
途惟此生靈悉均慶快三韓民物從今有恃於庇
依萬葉子孫洎後相傳於翊戴

同前謝酒表

元宗十五年甲戌五月丙戌世子諶尚元
世祖女忽都魯揭里迷失公主世祖賜酒
以燕之

寤寐淑女恩宣燕爾之婚宴邀嘉賓寵示權然之
飾光生樽俎喜溢襟懷伏念臣學靡緝熙資無冲
裕職叨監國誠殫三問之日勤義重嗣親首許十

綸之天合方展初筵之秩秩驟頒羨祿之油油禮
云既成德以既醉優沐蓼蕭之澤但期嵩岳之呼

告奏表

忠烈王元年乙亥冬十月庚戌元遣岳脫
衍康守衡來禁娶同姓而又責其官號之
同於上朝者十一月癸酉以改官制告于
宗廟癸未遣僉議贊成事俞千遇如元賀
正告改官制
獻處女十八

設官分職亘古經常因地避尊有時釐革中謝切
以朝班之制傳記所詳天子諸侯之勢則崇庠縱
隔於兩間公卿大夫之名則大小皆歸於一揆念
言歲域歷事大邦由漢唐已來暨遼金而下既仍

泥舊不思稱謂之是嫌苟曰為非何憚變更之斯
早今蒙使臣某至口傳聖旨凡小邦省臺院部之
官名爵號其與上朝相類者悉令改之茲用中書
省尚書省并為僉議府樞密院為密直司御史臺
為監察司吏禮部并為典理司戶工部并版圖司
兵部為軍簿司刑部為典法司其餘三公大夫之
階或蠲或改侍中平章之秩至乃尚書侍郎郎中
員外之名亦悉改焉云云敢守元來之典而違睿
勅之辭惟冀聖明俯垂矜察常置生成之地永觀
報效之誠其王親結婚禁約事一皆依稟聖旨

告奏表

今月某日天使某某等伏蒙詔旨勅臣以一家之義當於鴨綠江西開立推場貿遷有無兩國差官臨監交易者詳酌民便阜興貨利一家言重雙涕感深恭惟業啓千齡仁均四海修文偃革三萬里之農桑走賸飛琛八百俟之航輦又設日中之市旁通天下之財竊聞濱於來遠之城古有興王之島繫羣商交易者所就實兩域有無之相資苟百姓之足焉則雖不令而能行故三韓之聞此也乃有欣而舉喜但是弊封之偏小積于深禍以凋殘

地品瘠而疎民居貧且窶殊珍異產本非禹貢之載焉薄賦微貨猶是漢兵之餘耳幸荷大明之庇卹粗全遺噍以蘇醒顧營衣食之未周奚暇楮囊之斯辦以茲赴貿遷之地烏得無歉乏之貲此誠聖鑑之可兢實倍臣心之攸愧然恐違於天勅謹同議於使臣隨分募求有期支應

告奏起居表

日月臨頭常仰無私之照雲霄注目但馳罔極之誠

賀表

元宗九年戊辰二月安慶公湄還自蒙古賜王西錦一段曆日一道忠烈王二年丙子正月丁丑元遣別古里來頒至元十三年曆日一本戊寅正月壬子郎將李仁賚頒曆詔還自元○按東文選自此至方物表及上賀正起居表合九首目錄中書以公名而本錄混於李奎報名下姑此書錄俟更後考

云云蒼筤甫紀方啓候於首暄碧莢初抽想宸儀於元會際天所覆執壤而朝恭惟盛烈巍巍玉謨顯顯政審玉衡之正敬授人時令宣木鐸之和誕敷文德惟小邦之誠陋有何善之足觀但自昔時常稟大明之正朔矧伊比歲屢經親覲於聖闕感浚睿渥之過榮樂在皇風之大振適丁端履四倍

慶悼斗柄指東徒自馳誠而薦筭辰居瞻北恨難舉手而稱觴

物狀

云云土毛修貢雖未肩百辟之造庭暄背獻尊尚欲齒萬方之旅實前件物等豈曰多儀之享斯惟寡用之資惟是至誠達于聰鑑

賀聖節起居表

云云宸所居高常荷天光之下照海邦介僻敢忘藩職之上供瞻戀既浚禱祈尤切

賀表

云云壽星見南之節大暉誕生祥電繞北之辰庶
邦來賀恭惟功巍舞羽理極垂裳德貴道尊控馭
帝王之高致化成俗美陶薰天地之大和况慶旦
之再回想休禎之滋集伏念臣仰承丕冒粗保子
遺乘八月之靈槎倅陳薄奠奉千秋之寶筭倍罄
純誠

方物表

云云蘊藻之羞貴其明信苞茅之貢安可絕書前
件等物品不中程材非登噐雖愧比珍於燕石庶
無讓細於海流

賀聖節起居表

云云再朝魏闕全身是飲化之誠今復舊邦舉足
皆蹈恩之地况屬踐修於藩職益殫蘄嚮於皇齡

賀表

云云白藏告律適回電繞之辰紫極凝休采擁川
增之慶統臨所泊懽懽皆同恭惟德貴道尊天贊
神斐梯航萬國咸輸奉職之誠冠帶百蠻盡八同
仁之化况值誕彌之節倍膺難老之祥伏念臣濛
沐聖恩恪供藩務遠於千里庶修任土之儀永以
一心常切齊天之祝

方物表

云云節屆商飈適我西成之慶心同河水方修上
奉之誠前件物等堵地而生拙工所製非敢望登
於內帑但期庸展於中牕

讓中大夫國子祭酒左諫議大夫翰林侍講

學士知制誥表

元宗四年癸亥十二月丙寅有是拜
公上表辭職王優批不允批荅見下

賢路踐夏當使駑良而異分諫院清緊詎宜豢養
於非才揣已未堪避榮斯切中謝云云性資拙薄
學問浮麁但緣盛際之竒逢而忝康衢之徑造八

年翰苑粗免誚於鴈傳十載眉班久偷安於虱處
智識不能以諳練皇朝之典故文章不足以發揮
聖主之訓謨雖自期殉節於平生未嘗蹈得言之
寸地顧重權非所試可何睿意斷之無疑忽頒明
教之辭俾躡諍臣之列祿以璧水寵以銀臺自知
稱副之難誠巨曠瘵之懼伏望曲從危懇追寢誤
恩更按際括之材詳於樂採儻有琅玕之議庶可
飲聆愚分亦安物情皆允

元宗不允批荅附

李奎報
製進

大厦無丹雘之施皇居易副路車去鈴鸞之飾

法駕不成國之有文勢甚類此漢得班馬之彝藻黼黻而增輝於日月唐待燕許之粉澤鉛脂而垂煥於乾坤如爾者稟東璧之精擅西京之手六經百家之布置兮如九軍國鉞始授而號令嚴肅千態萬貌之作爲兮若三月宮花盛開而風日清酣形容意表之難名呈露腹中之所欲亞登金榜遺愛淡橘柚之鄉直步玉堂高吟到絲綸之閣赤手曾揆於虎吻碧眼解驚於鳳毛凡閱經由動隨聲望昔仁廟之代金緣惟清專掌大金來往之表章我寧考之朝奎報崔滋

財成蒙古交通之文字及朕躬之負宸憑爾筆之摛華矧今皇帝右文法度憲章之修立蠻夷左衽詩書禮樂之習聞每吾使之進朝異他方之寵獎豈以藩宣屏翰之微效謂存聲名大物之古風頃者皇帝詔書至有辭旨懇欵之語非有爾之所製之表情文曲盡而感動上朝則曷以臻此哉茲陞爾以祭酒之清資亦授爾以諫議之重任加八軛之寵仍三字之銜伏青蒲而抗封匪躬蹇蹇對金蓮而草詔游刃恢恢是所期於乃焉何不體而讓也

讓監試試負表

元宗八年丁卯有是除公上表辭不獲主試而取李繪等

程士之柄必其賢者能操瑞朝之材由此選而乃得安可幸其誤勅輒敢恬然冒承竊以主司之權成均尤甚既獨當掌試之才蓋寡而偕進角能之輩頗多苟非鑑識之兼人容有品題之失實如臣者寄身寒陋賦命孤奇元乏生知俊逸之稟資又為世故阨窮之奪志聰明以至於傷耗記問亦從而廢忘獵史漁經未剖幽深之義綴章緝句訖微典麗之辭猶偕虛名蚤蒙寵獎自昔玉堂之初直

訖今綸閣之久遊官私之製作也僅三十年寢食之遑安也非一二日鞭笞既困同老馬之厭馳韉繼常縻類飢鷹之難使精神益加於昏蔽頭腦未免於冬烘以此忝權衡之提烏得分玉石之眩伏望委高闕之照迴渙汗之宣夏揀精強俾專考閱則國之採賢也無濫士之懷寶者不迷眾皆歛譏臣亦禔分

謝監試試負表

同上

自天假手惟試席之主張為國理容在才華之薦擢屬當重委徒積危棕云云局促庸資麤疎末技

早登三級僅叨榜眼之名俄躡八磚粗効詞頭之命未嘗暫出於外頗得徐驅而前久居製誥之聯常典文章之任東施八西施之室強顰蛾眉南阮遊北阮之門空曬犢鼻况此選闈之提柄實為儒苑之極榮人皆把冊已來日幾翹襟而望及茲聞勅疑是夢而非真竊自揆能豈斯權之可副讓牢莫領感極難言此盖云云既臻多士之寧猶恐一賢之失謂臣儻宿於摛藻代匠俾專於度才臣則與手試眸策心努力修業及時之英俊因敢有違得賢佐理於聖明庶幾無負

讓知貢舉表

元宗十四年癸酉十月甲寅公以叅知政事有是除上表辭不獲與右承宣李顥同知貢舉取進士鄭賢佐等二十九人明經一人及第

用賢為政是為為政之先典選得人爰得得人之盛如或未孚於付授曷堪無愧於承當中謝竊以惟本朝古尚其文章矧上國今崇乎儒雅須揀離倫之茂異助添事大之光聲但以物殊妍醜長短猶眎外而可別才有否臧工拙固藏中而莫知除非藻鑑之精詳詎識英材之秀出如臣者素期忠國粗業讀書妄抱虛名早被詞林之獎擢常居通

職晚叨宰席之登庸然少也寡於聰明况老而加以鈍闇迺爾有品題之命烏能無遺失之嫌昔試成均已落冬烘之誚今提貢舉徒增潦倒之譏敢將黜勅之重違而此劇權之輕凜伏望云云廓迴神斷追寢誤頒更推衡鏡以擇能俾揭網羅而按逸則有副程文之任世不乏才將逃代匠之欺臣豈無地

代大將軍閔曦讓知御史臺事表

高宗十八年辛卯八月蒙古元帥撒禮塔圍成新屠鐵州九月壬子蒙兵陷宣郭二州十一月辛亥蒙屯平州殺掠人民十二月壬子朔蒙兵分屯京城四門外王以大

將軍閔曦知御史臺事往稿之結和親

天日餘光本無私於照瞻鉛刀鈍刃敢代割於吹毛恐袖手以傍觀徒汗顏而增愧中謝云云臣自離母乳常聽祖言凡詣縉紳無一毫不是君德苟利社稷雖萬死莫以親辭會臣始仕之時是國多艱之日寸舌講和於強敵孤軍定亂於逆民忠孝兩全微懇但祈於拱北功名萬幸殊息直許以換西諸侯笑晏嬰身不滿尺長舊將譏栢直口尚有乳臭青衫數載愧登漢傑之壇白首幾人虛老噲等之伍顧如栢署摠任霜威萬乘之動止有所箴

規百官之非違亦皆彈糾寧闕乎位必待其人况
今承爭戰之餘民情未定非舊有老成之德物望
如何豈意庸資謬膺斯寵伏望云云知人為急恕
物以宜安鶴巢於一枝委驥足於千里夏從僉議
追寢誤頒則聖德益明風猷所過者化庶官無曠
文武各盡其能

代大司成柳璈讓樞密院右副承宣左右衛

上將軍表

高宗四十五年戊午三月丙子大司成柳璈別將金仁俊等誅崔頊王以璈為樞密院右副承宣四月庚辰賜衛社功臣號故謝

聽鼓則思方墮殊息於天上挈瓶之智愧叨重委
於山西情所未安命宜即返中謝竊以惟中宸之
環衛迺上將之斗崇凡武士之階升雄偉必無雙
者况儒臣之帶處古今能有幾耶如臣者粗業文
章諒微智勇早費聖明之眷備夏華繁之聯義不
忘君常憤季孫之擅魯忠以奉國竊希周勃之安
劉一朝奮勢以唱呼羣士如期而鶩集殲蕩弄權
之孽豎洗清累代之腥妖茲乃乘陰消陽進之期
人臣共贊履否往泰來之會社稷同休盖由盛德
之使然夫豈臣能之若是何圖異渥夏越常句榮

遇踰日接之三寵錫甚朝加之九俾典唇喉於鳳
陛仍兼首領於貳班將鎖力以都劇權自知未稱
銜微功而市大賞人謂如何豈止畏譏方期獲分
伏望云云跡能官於文后心善將於漢皇追寢誤
頒更加精覈則旁招以廣得路上符注意之求既
登而知降階下獲褫身之幸

同前謝樞密院右副承宣左右衛上將軍表
勞輕報重如蚓餌之釣鰲寵侈榮踰類鱗皮之裹
鹿牢辭未格曲諭彌敦伏念臣承世祿于朝自賢
科而仕嘗向權門而屈已俯仰多慚尚從王室以

貢誠進退有秩幸今掃燻天之積禍果爾成衛社
之微功斯乃倚於皇靈實非關於人力豈圖非分
過沐異恩不惟得典於絲綸至亦叨叅於劔履本
惟駑緩但期冗食於詞林敢意雄飛反取虛聲於
兵幄得此兩兼於文武顧非萬幸於平生祇荷訓
章惟知感泣此蓋伏遇功無棄小賞不嫌多謂臣
外曾祖先臣克謙嘗有是拜欲令臣世濟其義故
將殊特之私猥及妄庸之品臣敢不敦詩閱禮有
希卻穀之帥師列事論兵無愧畢誠之在禁

代右副承宣元傅讓翰林學士表

署闢紅綃蓋求賢於華國詞頒紫綰不擇地而布
恩非所濫承切於牢讓中謝臣才非衆允用乏旁
施學問淵源既微貫綜該通之術文章氣韻又寡
優游綴緝之功端幸竒逢驟蒙異獎叨奉耿光於
書閣復兼邇職於誥垣翔騰方忝於龍喉負荷同
戡於蚊背何圖睿意尚記庸資特疏玉檢於中宸
令拜銀臺之內相茲一得之斯得焉得不慚况三
難之最難實難堪任伏望云云諒臣懷冒居之懼
知臣短台對之才追收誤需之洪私更揀傍觀之
巧匠則許燕墜手當盡辭於代言頗牧齊肩亦稱

旨於論事物情無歉臣分即安

同前謝翰林學士表

內翰搗華元屬工文之巨手北門視草過褒淺學
之頑軀未獲遜辭徒增欣悚伏念臣性惟鈍闇業
不精強自揆庸資豈合朝廷之器使端逢盛際偶
緣儒術以階升從始登科管記已來未嘗奉使分
符而出芸臺待制至叨三品之榮香案納言訖之
一毫之補識量不足以承當聖問文辭不足以潤
色皇猷方虞瘠曠之實多敢望獎甄之斯緊螭陛
忽沾之厚渥賈出心期鶴天高翥之殊榮恍如夢

拜撫膺自感灑涕難安此蓋伏遇謂臣方與於龍
喉知臣頗殫於駑力茲示私人之寵眷欲增文士
之歆觀臣敢不八影花磚嘗戒李程之晚八一條
蓮燭庶追狐楚之夜歸

代平章事李藏用讓門下侍中表

元宗九年戊辰正月己亥
以李藏用為門下侍中

臣某言昨奉制命伏蒙上慈除授臣門下侍中餘
並如故者白麻忽降於九霄震驚觀聽黃閣更躋
於一品度越分涯冒居靡宜牢讓足冀中謝伏念
臣才微峭鯁性滯恬虛但因手卷之勤粗避面牆

而立經書閫奧雖未能於折肱翰墨膏腴頗嘗得
於染指幸逢盛際備歷賢途忝華資於蓬館壁宮
兼羨拜於玉堂綸院納言宸陛鴻樞鳳閣之歷登
結好隣庭雞戟鸞輿之連奉久處論思之地訖微
報效之能况殘年已迫於告歸而蹇骨方期於就
逸豈意蟬貂之極寵又加鸞鷺之巍聯任既難勝
猶負重者又裝其載心不自肆欲而姑免乎
愆伏望主上殿下將追反於誤恩儻更揆於多士
漢家儒學豈戴馮之獨專唐代忠貞如嵇劭者不
少臣無任祈天候命激切屏營之至謹奉表陳讓

以聞

同前謝侍中表

鷄紵臚傳恩加分外蟬冠頂壓事若夢中揣能方切於遜辭稽勅

云云伏念臣發從科

第憑以門資寅緣聖代之竒逢跨歷儒林之重委細史析經之地多所妨賢汰才創命之場亦曾承乏龍案常依於白日驚鞭上了於青雲然又叨於鼎司略無補於袞職豈擬至仁之意尚記微勞優加殊獎之私俾膺極寵臣雖愧此世所榮之此盖伏遇云云念臣始終鑽紙於陳編憐臣前後負羈於絕域且謂臣外舅先臣某嘗有是拜

代尹克敏讓知樞密院事實文閣大學士太子賓客表

積恩增秩驟牽升於劇權踰分溢涯宜酌損於優寵茲貢撫謙之請庶垂肯可之私伏念云云器識庸虛文辭淺薄爰自龍潛之際幸叨龜遇之緣早居矢石之圍謹裁書檄多閱絲綸之寄至握樞機乃招盈器之尤嘗抱負薪之疾體氣衰羸而進退遲澁精神闇耗而應對跌蹉所恨逢盛代之重興未能致微勞而少補畫難之一鳴之效跛龜難千

里之行徒慚豐廩之坐縻但冀殘軀之捧退何圖
睿眷復授魏資崇政院中俾得知其事矣學士班
上又加大以榮之申以四賓昵于二極臣尚自驚
於濫賞物誰不謂之妨賢伏望追收誤頒更詢僉
議移此殊尤之命待諸碩茂之倫則大明益著於
能官罔浮厥職淺量惟甘於自局將適其安

同前謝知樞密院事實文閣大學士太子賓

客表

進華箋於樞庭自嫌駑蹇兼極榮於書閣况添鵠
飛靡獲遜辭徒深欣愧伏念云云拙於有用老矣

無能嘗爲吏於方州訖未顯效及品人之詞賦莫
得精詳久居三字之聯叨納九重之命並無可錄
方有所慚况盛朝非素餐之時而密職豈卧理之
地夫何異獎復許優遷縱虞瘼曠之多誠感寵光
之劇此盖謂臣有舊於潛邸知臣無他於戴天捨
其膂力之旣愆期以忠誠之儻售臣謹當扶持衰
病無全一受之殘形黽勉始終小補重興之殷化

謝東宮賜宴箋

元宗十年己巳公拜大司成是秋忠烈王
在東宮向學好讀書與公唱和有龍樓集
行于世仍賜宴
公上箋以謝

龍樓賜筵樂與賢共鳳翰搗藻儼若天成何幸而
觀况疑是夢切以自古承祧而定本皆先嚮學以
熙光漢儲招園綺於南山並令講德魏詞集應劉
於東閣相與賦詩博望之迎賓譙娛宣猷之致酒
吟歡畫堂宴喜之作則江摠應令禁苑餞別之章
則褚亮奉酬如茲歷世之流芳未可單辭而備記
本朝父堯子舜師呂保伊由睿宗以前嘗有唱和
集之傳於後及毅廟而下未聞歌詠事之在其間
恭惟我王太子殿下五稱聰明三至孝敬氣稟胎
教生知道德之純習與性成富有文章之煥至乃

崇賢尊老樂善好詩常謂朝家安有斯文之不右
故當寤寐庶幾吾道之夏東爲憐請退之耆儒爰
示償勞之寵睠屬黃花之商律開蒼竹之震宮詞
苑擢英梓林抽秀特臨蘭殿星羅水陸之珍羞俄
動玉毫露灑雲霄之寶唾星斗森茫於掌上笙簫
發韻於耳邊夫何富貴之嬌姿還有清新之峭格
比如靈粟初華之芍藥半折紅房檀欒一樹之珊
瑚纔離碧海和者蓋寡傳之無窮殊榮皆比於餞
疏令望倍增於歌啓仰喜睭眀之兩作克復古風
何圖文物之重興適當今日奚止三韓之慶賴實

惟萬代之休稱伏念臣猥忝陪僚獲叅盛集池蛙
鼓吹慙賡廣樂之音海鳥盃盤愧饗大牢之味但
渴心肝於榮抃期成羽翼於始終

迎主教坊致語

元宗十二年辛未忠烈王以世子入質于
元甲戌五月丙戌忠烈得尚安平公主忽
都魯揭里迷失六月癸亥元宗薨八月戊
辰忠烈東還即位十一月丁丑公主至自
元妃嬪及諸官主宰樞夫人皆出迎○忠
烈三年丁丑十二月丙辰韋得儒盧進儀
誣告金方慶謀反四年戊寅三月韋得儒
等又言於恭丘曰國家談禪法會所以咀
上國是月甲午元帝命王入朝四月甲寅
王及公主世子如元六月己巳王及公主
謁帝帝設宴慰之七月戊戌元帝赦金方
慶又命罷忻都恭丘軍種田軍合浦鎮戍

軍癸卯王辭歸元帝遣使護送皇太子皇
子皇女諸官人餞送歌舞侑觴九月乙巳
王與公主至自元百官班迎于郊是行也
凡國家駁擾事一切奏除國人頌德感泣
○按東文選繫此文於
甲子者似是誤更詳之

朝于王王燕樂特頒雨露之恩後我后后來蘓咸
慰雲霓之望趨者蹶者舞之蹈之恭惟主上殿下
邁舜聰跼濟湯智勇應期啓統確施馭世之規繼
好息民淡得交隣之道昔在青宮而親修聘覲今
臨紫極而又被詔徵于時廟議紛紜輿情恟懼自
宸衷而果斷為祖統之洪延不憚霜雪萬里之勞
而詣風雲一庭之會既見止既觀止視和容如琴

瑟何昇之何子之將厚意以幣帛至如亭館道途
之戒飾餼牢伎戲之供懽窮萬狀之繁華極一心
而貺好遣以禮樂佩殊寵而言旋約爲和親輦太
平而奄至事賈絕於千古功莫高於百王惟憐閣
之大功臣是鳳池之賢相國一德早符於天賚萬
機皆協於聖謨軍國之寄靡輕稟教條而居守乘
輿之行旣返擎神罷以奉迎豈惟積效於無前思
欲盡誠於享上爰暨同功之輩謹修迓主之儀丹
巘碧巒日下綵山之湧出翠華黃屋雲間玉輦之
迴來鴛鸞先導以後隨貔虎左環而右擁笙歌沸

地兮懽聲滿國簪袂填街兮喜氣浮天於戲往以
百憂來成萬慶若於昨日曾未協於都俞豈得今
朝致如斯之快活須信聖賢之並出本繇天地之
相期妾等姑射爲家蓬萊結伴遙知盛烈自從曠
代以未聞切欽一作飲休風欲奏微才而偕進不勝
抃躍仰獻歌謠詩見上

止浦先生文集卷之二終



國家圖書館, NATIONAL CENTRAL LIBRARY, TAIWAN, R.O.C.

止浦集

坤

國立中央圖書館 NATIONAL CENTRAL LIBRARY TAIWAN R.O.C.

止浦先生文集卷之三

啓

上座主金相國良鏡謝傳衣鉢啓

高宗十九年壬辰五月辛丑公登文科文
 振榜下第二人及第知貢舉金良鏡恨不
 置第一以己亦嘗登科第引和范傳衣
 鉢故事慰藉之公作此啓以謝之駢儷精
 切出人意料○范魯公質舉進士時主試
 和魯公疑愛其文置第十三謂質曰君之
 文宜冠多士居第十三者欲君傳老夫衣
 鉢耳質獻以詩云從此廟堂添故事登庸
 衣鉢亦相傳

某伏承恩門相國嘗登科為第二人至踐相位主
 闕禮闈僕以不才亦及門下第二名蒙舉和范二



魯公傳衣鉢故事言及之者

三年後目無全牛妙入庖丁之手下百步間相有
孕馬價增伯樂之眼前例蒙恩幸者猶切粉糜况
踐世科者曷勝銘佩故將淺述仰謝洪私竊聞周
關西雍始膳羞於國老漢開東觀初蒲帛於儒生
枝蕃晉魏之間業暢隋唐之始此皆路九流而聘
士門六藝而招賢或程之以四科或策之以三道
鄉曲淘沙於俊造歌鹿鳴以送都公卿推轂於賢
良薦鶡表而授職加帖試文兮權輿於思立糊名
考實兮粉繪於載言本不限於尺微又不拘於耆

幼是故路温舒爲獄吏俄舉孝廉之科匡稚圭起
農夫卒升文學之選抽身於傭賃者有如闞澤拔
跡於藪牧者亦若孫弘兩孩登德祥榜中五老出
鄭熏門下繫得人於斯爲盛蓋崇文自古而然咸
業儒以馳名競聲譽而定價華歆頭那腰管尾曾
聞魏友之龍飛孔子首淵翼騫翎亦見唐賢之鳳
翥馮道剛閱雍陶於詩集孔文舉謁元禮以世交
攬工部袂拍翰林肩杜荀鶴遇知於顧氏識賈誼
面把相如手裴耀卿被薦於張公然以心論固非
貌取豪傑雖殊兮豈仰鼻而四手八足鬪背相混

上海集卷
兮皆戴頭以九竅一身下里屬和者數千東郭濫
吹於三百瞎者求形於日觀空戛銅盆聾者效響
於雷門屢搥布鼓至於走蟾蜍之步而將期逐電
垂蚯蚓之芳而欲望吞舟拙斲汗顏未會傍觀之
巧匠弱拒張臂平看閉縮之猛挈曾不自量其才
但有欲得之意故楊諳有市瓜之歎而盧毓含盡
餅之悲諒非察李程五色之賦頭嘉錢起數峯之
詩尾遂令項氏得蒙祭酒之愛人亦使胡曾不怨
文章之生子則安得試席免冬烘之誚禮闈蠲秋
行之譏仍收在握之珠又撫八懷之璞華清宮賦

值吳武陵以標名古戰場文曰蕭穎士而擅美但
以鑒裁邪正而好惡兩立稽識博窄而屈伸雙分
飛鐵鑠金盡在抑歇之心裏泛沙沉羽常開翻覆
之手中是用董萬爲白蠟明經鄭華作青衫賜第
以羅隱清新之學丹桂成寃雖高蟾俊逸之才碧
桃抱恨劉氏老於十年試燭張生悲於千佛名經
故茲選舉之場號是崎嶇之路只先才命雙得而
後立敷兩全若乃鮪戲詞溟麟遊學藪濃雲震電
發可畏也文似嘉謨懸河瀉水注不竭焉氣同郭
象繼萬言於凌準追百韻於肩吾右攫左挈兮筭

其拳前充後敵兮確其力穿天心出月脇幟盛聞
於寰區軋乾軸撼坤樞籠嘉聲於海宇如此者殆
非他故盖在乎幸遇知音本朝龍蟠虎踞之三韓
狗吠雞鳴於四境表裏山河兮地靈人傑出八將
相兮器博材長若薛聰崔致遠之俊髦曾獨步於
羅代如金摯赫連挺之豪偉後雄馳於鎬京及乎
玄鳥墮卵而聖祖誕生白魚躍舟而義兵爭起櫛
風沐雨拔鉞秉旄武泰松壤之受符鐵圓天授之
即祚始當草昧雖未暇於武功終啓昇平寢聿修
其文德建大乾祐與我光朝廣辟賢良增修制度

時有後周之帝勅虜使以前來我聞雙翼之賢叅
黠聰而上請畱授禮賓省使詔爲貢院主人甫閱
戊午庚申辛酉之春官連擢崔暹光範舉猷之甲
第峻豐之後趙奭收金策而升進開寶之初楊演
與思柔而繼登爾後王融之典場屋者十餘夢游
之握銓衡者三次景宗御東池之龍艦親策高凝
成廟臨北極之螭墀命掄邯贊自茲以降祗率厥
章儒道盛行世不殊乎大上古海邦雖僻人皆謂
之小中華程試之年則或比或差甄掄之數則是
增是減睿宗登極乾統立元定乙丙科用革取人

之法起文武學廓開養士之規館置之區七分國
養之生百數或補之以博諭直學或校之以論策
貼經舉敏庸韓子純之十一徒俾頌歌於兩管遣
權適甄惟氏之四五輩承學問於中朝洪灌尹諧
之流考講論典謨金綠富軾之輩考主張文翰揮
羽觴於乾德殿喚新及第而讌遊藝蠟炬於絳紗
樓勅諸詞臣而賦詠文物煥焉大備國家晏然無
虞長安百萬家渾是太平之烟一作風月故國三千
里揔爲禮義之江山雖然物盛卽衰噐盈必溢仁
初晏駕毅倦宵衣適丁秦徃之辰曰甲否來之亂

山東颺起輦下塵飛館閣諸儒惆悵昇天之長吉
箕裘舊學淒涼落地之下商然斯文不燼於秦故
吾道更肥於魯傷弓之翼搏風翩翩於鶴天濡沫
之鱗得水洋洋於鯨海廓若選賢之道紛然把冊
之徒其歷年也三分一千而無二焉其開試也百
有六十而又餘矣方今德可碑南山之石息其波
東海之潮學于甘盤達古今之理亂政若貞觀當
朝夕以憂勤命宰輔之任則覆以金甌重儒雅之
臣則送以蓮炬以謂燕主市死馬之骨駿馬來庭
葉公好畫龍之形真龍入室故欲旁招於羣士宜

無求備於一人施於楔糜棟樑大小短長之不棄
備諸蓼禾芝桂醎酸甘苦之無遺縛虎之才兮歷
玉堂而登文埤批熊之技兮遊芸閣而八誥藪每
當間歲特命宗工分香桂於選闈燕國許國之大
手踏青雲於平地盧郎陸郎之少年占高第者使
管記於雄藩登下科者令效才於散地從此滿朝
之貴頗多學古之儔恭惟息門相國閣下玉鸞竒
才石麟異表精神降於鵠嶺公獨得之傑然骨格
貴於雞林世不墜乎貽厥耿介之節朝廷右之霜
竹謙遜之心宰相中之布衣雖本初世系遠長及

中間門祚衰落大人赴瀛洲之刺史任騎篠馬以
追隨數載投喜安之昌黎公就杏壇而講習豫章
之木雖小也已有凌霄之氣駮駟之駒雖弱也早
含逐日之心以齒之稚幼也每喜遊嬉然性之穎
悟也頗工詞學泉涓涓而始達火焰焰而大燃初
不用意而宿藁撐腸及其成章而耆儒拱手出乎
類拔乎萃如野鶴之處羣雞動於中形於言若春
絲之抽獨繭技與行年而漸長名傳衆口而相譁
洎返鳳城旋登豹榜張曲江骨雄力傑金毛獅子
之內視犀象孩撫熊羆李謫仙氣壯心遐雲翼大

鵬之足縈虹蜺目耀日月作賦善於駢儷同時莫敢躋攀行中艷冶之形容也趙后楊妃盡態極妍而滿頭插花句句裏屈強之勢力也孟賁夏育揚眉吐氣而攘臂持戟傳之者腕脫而京師踴紙誦之者唇腐而奴隸解文或侍從於銅樓或優遊於壁水擅鳴詩之席則世無臺敵專發策之場則人或轉張蓋丁鶴吊之憂姑寢鶯飛之慶迨夫闋服夏切收科當攝提格之紀年值崔相國之掌試掃千軍陣韓信雖國士之無雙封萬戶侯子房作功臣之第二鄭壘之先登者決矣羿設之不中者

命歟曹經置鶴之間年出倅燭龍之遠塞清若玉彤之補櫂鎮留遺愛於大江賢如李勣之長城盡八閭眠於高枕滿瓜期而復洛典蓬館以曬書與諸清襟貴遊幾許高吟爛醉拜監察於憲府咀開口合口之醜椒除拾遺於諫垣搗啓心沃心之良藥望跂傾朝之濶步官新稱意之徐驅頃者乘赤鼠之秋有丹人之寇忽闖入於義鎮窠轉鬪於忠原只隔一江非馬牛所不及尚堅雙壁若蚌鷸之相持公惟佐幕於中堅時乃轉籌於前箸陽若縛橋於出擊陰令麾陣以邀攻誰敢當鋒彼皆褫氣

傾五嶽而壓外鼓千爐以燎毛然此策誰謂奇歟
於我身亦爲細事又寅歲之將抄有大軍之歛來
皆云何處之兵若蹈無人之境侵滯城堡劫掠髦
倪是猶捨虎逢狼何異捕蟬彈雀碧幢元帥問誰
能往餌於獸心黑稍將軍皆不欲先填於虎口公
乃身雖一介氣敵萬夫寧且爲有義之骸可不致
見危之命豺狼叢裏吾戴吾頭而直前胡越舟中
敵因敵勢而俱下拳大漠於一掌肉強虜者千頭
裹韓囊魏而公之功百不墮頽嵩壓華而公之節
一何壯與彼帥而祖送整吾旅而凱還遂乃論功

時惟注意擢處龍喉之任禹都舜俞演成鸚口之
辭謹草產潤適在執徐之御歲曲開司馬之試闈
藹然所擢之倫盡是知名之士故一門下由藻鑑
之至明不數年間捷桂科者太半向有黠頑之北
虜歲常侵擾於東藩使難其人疇咨於我丹穴山
中九苞鳳久翔赤石之墀紫皇案前五色麟俄掣
黃金之鑠出轄行營於鯨海八都大理於魘廳以
我賢無敵於廷中仗使節又巡於塞外號令胡兒
於一鞭之下縱橫神筭於十指之端幾處舊題今
始得紗籠之碧舉城遺老更相驚蓮幕之紅整冠

之嫵生於未然露齒之謗起於無事金字映牧丹
葉詩兩句之幻題竹符分槐樹枝夢一場之謫宦
政雖多最今此略陳是州之曠獄也千古未聞自
我之下車也一年無訟蝗不八犬牙之界歲亦有
秋雨旣霑龜背之畦民不憂旱星灰不再劔履卽
還久首處於臬司又帶監於軍簿昨離星座俄轉
銀樞名入琉璃瓶位已魁於崇政院夢飛藥砌時欲
起乎望省樓魏鑿鑿唐蕭柱柱漢歷位彌重而身
猶太瘦憂國益深而鬢亦早華椽筆之任兮皆委
於予羽書之勞兮悉歸於我領貢賓無枉路兩關

王起之文場教英俊在吾門百絕禹偁之遺恨天
子嘉乃世人榮之無夫子國將奈何曰非夷狄如
也蓋我公天所幸爾惟是禮文係焉伏念暗甚猪
驢頑同駒馬把泔忍易盈之噐振滄浪可濯之纓
起自鋤犁曾奮草圭之迹交遊紈綺早知翰墨之
榮學將備於三多能庶幾於六絕跡前靈於黃卷
心往訓於青箱竊謂獮不是兩頭猶作毛虫之長
鳳亦非四翼尚爲羽族之先希驥之馬也是驥之
徒學龍之蛇也亦龍之祖况其人賢者能者易其
地彼何予何所謂聖賢豈天墜而地湧蓋由才學

誠日就而月將誓不遵衛鞅之盜蹊常欲履一作避

楊雄之正

一作邪

路贏糧百舍負笈千箱筆爲鋤墨

爲稼穡義理爲豐年切慕蔡洪之舊業紙者陣硯者城池心意者大將欲追逸少之竒圖掘井九仞而戒不能於及泉斬松一枝而知不足以支厦况裁衣旣行者猶可縮也而制木旣方者更難圓之進德修業欲及時讀書著文以爲事斫石成粉磨巨闕之雄鋒傾城量金銜純鈎之善價應侯之闕期於角虎陳軫之盡戒於足蛇年遇巫山之峽而始獻藝於成均齒屈危宿之躔而得登名於造士

小慰棘薪之養粗償蕪葉之答孟東野半夜之壯心驥足白日莊南華一生之大志鵬背青天更結網以臨淵益揮斤於斲堊雄腸壯腎雖未免於凋殘羨目妍眉恐或多於倒置砭灸風騷之病耘鋤韻句之荒非不知制文千字之散騎郎鬢髮頓白飲墨數升於禮部試口吻皆黔羅友貧而鬼椰揄顏回臭而虱繚繞儒士之誤身者多矣詞人之薄命者有焉然而先難後獲者人之常始賤終貴者物之理韋公隨粥於左街僧錄足躡台階王氏寄飯於上堂閣梨身登相位是故嗟畫鵠之不類恐

刻猴之無成以日爲年忘寢與食不揆虎穴焉得
虎心更切於呂蒙上度龍門化爲龍尾欲燒於鞏
水福輕乎羽禍生有胎養日短於哺烏愛河渴於
舐犢生芻一束忽遭郭泰之母憂積粟萬鍾敢望
仲尼之祿仕哀情乙乙隻影庚庚把曾輿北面之
悲詠潘岳西征之賦江樓春柳山館秋風長沙劉
蛻之爲文爲丘陵爲川瀆爲墟壤爲都邑君山道
士之養性養雲雨養霧露養風霆養霜雪鼓齒頰
以吞曹劉麾鞭笞而走賈馬舌耘諸史心醉六經
神仙之訣則涉赤松獬卷之三戰陣之行則獵

石龍韜之六及臨祥朝欲揚陰鶴之音返戾洛師
夏掉斃蛇之尾繩樞草舍渾無用反爲韓蒲之兄
藁山筆塚未遇知自歎金陵之客難馴良甚於鞭
蹄馬所癡有同於膾髯蛇荒澁之文稍許於韋布
之友浮虛之譽謬騰於筆硯之儔標鷲無棲企望
庾公之厦鮑鴈得意擬充薛氏之庖屢與稠人輒
揚狂語如不登科則已彼其過我者誰是躍爐作
劍之時實點鐵成金之日遂持銳刃旋赴敵場于
時爛熳文茵穀樹滿塲之水雪淋漓墨浪桃花三
級之風雷銀枹拂彩兮白蟻環巡玉管攢芒兮綠

蠶蠢動爭掉鞅而賈勇競摩壘以示間手握靈龜
紅涵苔之蹠躩口含彩鳳碧梧桐之翱翔我乃已
老之蹄念餘力於去年未調之羽望高飛於他日
而謂曰蠅點污於美錦豈堪全疋而燔乎蟻缺成
於白圭何害良工之鎔也掇孤蘭於百草抽一月
於衆星始而從試者其幾千餘終焉八幸者只二
十九玉色御邇英殿上俯觀八穀之雄豪桂醞頒
勤政樓前勅許綴行之呵喝翠蓋雲飄於街市紅
綵霞爛於門閭雪布藍衫人面映杏園之春色星
毬月杖馬蹄驕燈閣之夕陽遂將李摯之同年共

造德輿之私第粉壁乍懸龍虎榜敞華堂玳瑁之
筵蛾眉爭唱鷓鴣詞侑玉罍菖蒲之釀前列後行
兮鱗次舊兄新弟兮翼趨金玉鏘鏘而唱酬冰霜
冽冽而諧笑盃盤錯落幕席闌刪遂羅拜而陳辭
獻龜鶴千年之壽因起趨而成列放驂騶一烘之
塵恩光洋溢於頭頭喜氣怡愉於面面觀者如堵
爛其盈門重念某自少飲名居常作意與左內史
同時而不登其門者豈云善賦與鄭都官並世而
不入其室者奚謂工詩况逢知我之鮑叔牙合作
麈尾之霍去病枕戈待朝焚舟濟河初接短兵五

十步而後止再開精陣百萬軍之莫當卒未先鄭
獬之狀頭亦不下朱巖之榜眼分定故也吾何歎
哉魯公出魯公門喜襲傳衣之蹟曾子居曾子里
恐貽投杼之譏六鰲齊頂於海中而未足荷其恩
山八駿促蹄於天下而固難周乎德宇予有偏親
兮公實榮之子有冷族兮公實暖之文詞焉得如
公則何堪爵祿焉倘如公則可異冶我容妍我面
既逢傾國之媒強其脊硬其頭將戴培山之簣昔
者橐飯之感也猶倒戟於趙宣子壺飧之惠也尚
表間於僖負羈况承房杜之拳而獲其操持又嗟

沈謝之口而受其咳唾敢不生而頌德則筮簪尺
喙死而償息則柴炭寸魂顧我心若張弦安有斯
須之弛也噫吾首寧至地可無俯伏而謝乎

疏奉 教
製進

內殿行百座仁王說經道場疏

有三般若斯為護國之靈殊無一衆生不仰能仁
之法兩龜嶠之妖氛自息鯁川之怒浪亦澄當時
千主之免殃歷代百王之資祐佛非誑語經豈虛
言竊以久矣殘邦寸于厄數松麓三百年後曾持
大寶以龍移花山四十載間叵奈強隣之蚕食念

從監撫迄至重艱累嘗親近於上朝粗得庇存於東域然賊臣之擅命謀動國家賴皇帝之矜哀復奉社稷詣闕謝恩而旋返興師結援以送來縱能除專門弄權之克猶未免去水就陸之勅方諭朝臣而遷出忽遭夜卒之亂離父子妻孥之莫能一作得保全在十斯九公私帑藏之凡被攘奪非萬則千設有逃脫者垂蹈于京師彼皆逆捉而反爲之臧獲噫衆庶疲於負戴者林樾草間之方處自霖潦至於淒寒者藁門圭竇之未營大軍纔還畱騎尚擾兩地士馬之供億殆難給於是冬三韓民物

之耗淪未有甚於今日且吠主賊徒之敗期難料而朝王世子之利見何如俗壘訛言之孔多皇穹咎謫之不細雷亦類於失律霧常暗於非時變怪實稠吉凶安在釁常積已國焉如此其爲容灾有遺邪天又將何而措意臨食而茶蓼滿口擁衾而冰霜結膺綢繆牖戶之病鴟室家未有沉滯膏肓之疾豎鍼藥難爲唯憑佛法之加持可啓朝家之帖泰但以禁宇熏塲之草創法儀供具之蕭條既萬般事勢之未周而一片誠心之徒切太平若鳥飛沙上空有徃蹤妙應如人到鏡前倘觀來狀迎

百師而峙高座約三日以繙勝詮早知七難之皆
除胡慮千祥之不集顧弟子每攢於覺鑒惟望興
悲猶嬰兒常叫於慈親輒斷得哺所恃祈處之有
素寧忘發誓言於無邊

洛山觀音慶讚疏

無盡眼無盡臂塵塵刹刹之現機不住想不住空
物物頭頭之垂應繪塑瞻依之苟切聲形感激之
難思伏念爲君何樂處已克艱萬姓多愆當使誰
而任責羣僚有過蓋是朕之無良陰陽寒暑天之
經也民或怨予水旱豐荒歲之數也俗皆謗我况

今弟子乘累紀亂離之後掇三韓萎悴之餘沙漠
非八夢暫遊再勞跋涉干戈是聞名亦怖幾見擾
侵今雖蒙上國之加憐尚未副前時之稟勅上天
之陰霽須臾或變世間之愛憎朝暮安知噫我使
輶去矣踰時而未返故於私慮疑其有故以頗淹
非惟外患之如斯抑此內虞之迺爾刑政皆紊而
風俗頽汙財穀並殫而公私困窮蓋緣人事之不
修而致咎徵之斯集月星失次何其多上以封章
雷雨非時此亦豈爲之瑞兆謂兵飢疾疫之可畏
而寤寢憂勞之曷戡追思既往之焚窠更念將來

之茹纒但借慈悲之攝護獲臻社祚之延洪惟補
陀洛山有觀世音聖碎儀嘗從於野火殿宇並燒
新構復湧於崑崖垣牆既備輒求巧匠謀就尊容
屬當告畢於勝功規說落成之熏範心歸寶崛孤
雲不碍於去來影滿清潭一月何殊於今古爰掃
禁圍之高閣特邀禪社之悟流或大慈或聖號之
呼號或直指心宗之演暢十方擊鼓圓通常無碍
之真聞一處弄鈴空手也不干之妙戲精熏瀝懇
慧照當頭伏願天妖地怪之散消祖業邦基之悠
久隣歡愈固夏無邊境之聳驚儲筭尤長亦致宮
護於法輪

內殿行金經說經疏

八萬法門此典獨居尊於南面十千天子當時皆
得記於後身奉揚最叶於帝王家饒益難思於功
德海遇事輒殫於蘄扣隨機奚阻於衛持念子殘
弱之邦隣彼盛強之敵生靈殆盡於兵後十喪九
分社稷粗完於鹵濱卅有八載但爲小子親朝之
故頗蒙今皇厚睞之加雖幸臻遺噍之保存尚猶

督古都之遷出况於此日益以多方西覘伐宋之
海程東導通倭之木道或勅供千艦而倅來始造
或詔出萬兵而點閱乃還禍心是巧設之機關恐
將觸手而當發危勢如閻書之文字雖不現形而
已彰顧茲厝火於積薪安可遑餐而高枕噫權臣
之賤隸賊爾主之孽孫初假名於衛社安民至竊
寵於封侯立府聚類樹黨擅張威福之端徇情營
私焚紊政刑之紀破千家而恢拓堂宇屠萬姓而
欲攘貨財腥穢聞天毒痛遍地自無心於事大不
會圖長凡出計者泥卑徒欲竄遠茲將三韓之怨

怒幸成一朝之掃清中外懽欣兆庶蘇息何珠躔
又譬於圓象乃木曜方守於太微吁是何徵惕然
同措國步類乘舟渡浪下之搖蕩也上之未安人
情同抱雪負冰前則寒痛而後則尤劇要得銷虞
於玉壘亦須慮患於蕭牆欲攘灾朕之如何惟借
覺慈而止耳邀屈毳袍之淨侶塲闢九重演宣金
鼓之圓音限期三日功緣殊特福報甚弘伏願八
部神將之稷衰危四大天王之扶社祚譴謫悉收
於乾度變成喜慶之祥和親益鞏於帝庭永斷煩
苛之責文武和睦而廉貞奉職雨暘克諧而昇平

有年物無疵癘而既繁朕亦壽康而增享

萬德社開設冬安居法會疏

三世諸佛現化之本意唯開一事曰緣九道四生歸真之妙門亦假兩權方便是法最爲之奇特而予痛切於奉崇言念好迷奄從幻化來既有期於多劫去何無信於一朝矧邇遭邪崇之期所以劇平生之痛使予銷髓所恨者無奈惡曰緣由爾發心翻思之却是善知識但到此千般之受用將竭乎一路之導教凡所聞鉅善與勝功悉皆瀝至誠而隨喜欲認依歸之處然後小休堪嗟殘劣之機

尚稽顯應緬惟萬德之精社恒峙普賢之道場通開玄律之安居爰辨清流之服襲遙瞻海會擬嚴諸佛之身愛想化城不隔衆商之眼九旬精進萬聖證明云云刷滌塵根消磨障垢脂粉菩提之面目似舊粧臺線針調御之衣冠添新補處

內殿請說禪文

朔吹掀天寒暉轉樹萬像自然披露一言那得諱藏恭惟四威精進幢三界吉祥水超理絕情之氣築高視古今住方攝衆之規繩獨冠前後曾不擇山林城市但將觀時節目緣况今天譴頗多國憂

方殷噫寡德尤切於可救顧法王忍慳於興慈伏望開賑窮之門發應病之藥如烘爐點殘雪潛消妖異之萌把古笛吹落梅弄出太平之曲

書製進

與張學士書

元宗元年庚申四月辛酉蒙古遣其多大詔王勸課農桑以阜殘民雷軍壓境已飭班師被虜人民又令放還云云丙寅遣永安公僖奉表如蒙古此書似在其時矣

孟炎伏想台候起居千福瞻企瞻企閣下以瑞世之才遭遇睭明陶鎔品彙粉澤典謨聲文章之鼓使天下聳聳如去聃矚忽聞雷霆此千載一時偃

武修文之際也海外之引頸於閣下者豈啻若鳳凰景星之一出耶昔漢高祖得天下於馬上雖威讜伏諸夏而禮文作之闕如也及乎叔孫通制朝儀興儒教然後天下咸知大漢之貴也閣下之功業與叔孫通豈可同年語哉前次親朝伏蒙閣下多般庇護以吾情實委悉敷奏由是皇帝特示恩慈館我以華邸慰我以雅樂至於讒說一皆禁沮勅許送還賜之駿馬寶鞍以侈其寵感荷之至言所未竟也還國以來但增遐祝比承荆郎中奉傳詔旨云完復舊疆永為東藩又云島嶼殘民窮兵

極討殆非本心又蒙詔旨云出陸農桑以阜殘民
壓境雷軍已勅班師逃虜人等放令歸國宣諭如
此需以好生之德者豈閣下推誠佐理導宣恩宥
之所致也所以三韓百姓悉深感戴有望於夏生
一依詔旨已於古京營葺出居但古京之荒廢垂
三十年殿宇家戶須芟刈草木而新之故不可立
就諒爲蕭條其比來諸官之見將爲何似以往奏
耶徒增閔望耳伏望閣下的知情實益軫矜慈使
小邦永永供職

與王學士書

學士名鶻每見公所奏
表辭恨不得見其面

某啓前月日使价迴備諳閣下佳裕千福欣慰欣
慰閣下以傑出瑞朝之才首登黃甲之科遭世中
否韜光待時今遇聖明爲蒼生而一起筆端膚寸
潤及萬邦使日月所照皆成文字天稟根乎仁義
常以哀窮濟急爲己任每小邦行李之往來也欸
曲敷奏導降宸慈又於年前禮部侍郎張鎰行李
館待殊厚賜以華服寵慰而送還伏承回詔益知
睦邨之尤篤凡小邦所未便者悉皆先得其情如
舉荒殘之地置之掌上而親賜覽也至乃權場之

議立也姑使安之鷹鷂之請捕者亦令罷之加又
特頒具註大明曆曉諭民時俾海隅餘黎復覩大
明文物之重興也咸知有望於保全者豈閣下力
揚臯鶴之聲登聞于天之所使然耶舉國咸喜不
覺涕洟之俱下矣况承閣下幸謂小邦素蒙皇化
粗尚儒風者久矣輒以祖庭廣記一部垂示則不
惟榮其異貺亦且欣吾道之東矣節次前去使价
伏望閣下益加矜護卽於天陛善爲之辭孟炎方
屆惟冀爲天下自奮以副翹祝之懇

元宗九年戊辰十月庚寅蒙古遣脫朶兒

等來點船與兵十一月遣國子司業李淳
益如蒙古賀正
此書似在其時

謹拜書于銀臺內相閣下卽辰三元肇啓餞鴈賓
春緬惟體况休和益膺五福念自八朝奉欵來常
仰恩庇敢忘于心今有區區一二事不敢徑達于
宸聽惟望大君子耳小邦自三十年兵役以後民
物大耗惟是日支之資歲獻之賦不能自給况今
玉人鼎至諭以東倭西宋之事且令供萬卒千艘
山雖有材造船則奚逮至千民雖盡籍勝兵者豈
得至萬假使實其數將涉大洋遠圖他國則彼亦

能無蔓毒乎其必於我憾之深矣然則雖不敢侮
上國卽於小邦爲害甚易惟是海上之尺地恐不
能保將孤皇帝涵毓之大德念至於此可爲痛哭
伏望閣下諒蹈險鄙遠之難哀小邦首尾之畏發
潁仁援大義從容曉達于宸聽而後奉移天意使
小邦處恕矜之地則耳鳴之德曷可殫言今差賤
介詣闕賀元因致緘啓于左右惟冀新年爲天下
珍齋永庇小邦

碑銘

卧龍山慈雲寺王師贈謚真明國師碑銘

序并

國師諱混元俗姓李氏遂安縣人也考師德官至
京市署丞妣金氏閤門祇候閔甫之女也夢飲甘
露因而有娠生而穎悟知敬佛乘年甫十三投舅
氏品曰雲孫禪師宗軒披剃受具聰慧絕人學通
內外遂爲崛山藜席之首中禪選上上科雅志山
林誓不踏名途策杖遊方初謁雙峯辯青牛服勤
數載因得其間奧次詣曹溪無衣堂下大爲器許
又嘗師事清真國師所至相從稟受曲折盡得其
骨髓故於古人公案洞曉其指歸游刃玄關得樂
說辯才柱國晉陽公嚮師道行奏加三重大師又

奏請住定慧社無何以領衆不無憂累抵書晉陽
公固辭尋例加禪師師既不欲作住持人但隨處
演道故世稱法主而不名焉乙巳歲晉陽公創禪
源社大張落成會請師主盟明年丙午師領精鍊
衲子二百赴京師入禪源高王特批爲大禪師晉
陽公撰疏遣門客請開堂遂陞座嗣清真數日上
幸臨先獻金欄袈裟跪呈請疏師說法稱旨上大
悅師雖居輦下志在雲壑請還山上不許至壬子
八月清真臨滅以院門事屬師上於是命住曹溪
爲第四世仍命中使陪住曹溪以冬十二月入院

再扇牧牛之風丙辰秋請禪院法主且公自代得
僊雲水然朝家以福利爲望尊禮不衰至戊午歲
上欽師道德欲以不臣禮事之命立封崇都監仍
命斷俗寺遣中使禮部郎中崔鐸迎之師不欲受
教中使陳主上渴仰之誠師強起西上上使迎勞
八慈雲寺時久旱其夕忽霈雨中外慶歎旣已請
掘衣之禮己未五月十一日冊爲王師上欲親行
師禮因不豫寢之俄而上僊元王卽祚適追寧考
禮遇殊加以卧龍寺爲下山所師懇乞退休至于
再三上曰朕欲畱師親蒙法蔭師意確切竟不可

違冀無以遠邇渝意永福三韓延八大內親行師禮手自進饌從容接話至晚乃辭輒命中使護行以庚申十月下山八院上堂公入門殿閣凌空舉目溪山似畫人云倦鳥知還天遣老龍憇卧諸仁者龍既卧矣慈雲何在良久云行到水窮處坐看雲起時四方學者雲臻說法利生凡二十一年殿宇之頽廢者皆重新之人謂開山景空大師復來矣王舅大禪師鏡智小投陽山圓真國師祝髮敬重於師事以門人之禮因受朝旨移籍於崛山爲品日孫住斷俗寺常來禮覲其爲尊勝所敬重類

如此至元八年辛未十二月一日在方丈示偈云今朝臘月一看看三十日三十日到來正念無忘失至七日示微疾十日晨侍僧問訊師舉佛眼鼻從空裏飛入向心中住偈荅話如常作上國王書并封印信付侍者至申時夏衣着伽梨坐禪床叉手當曾端然示寂顏如傅粉屈伸如生十六日茶毗于寺之後洞門人奉遺書并印信乘傳申聞上震悼加封國師贈謚真明塔曰普光下教晉州牧副使戶部侍郎薛昂襄後事壬申二月十七日浮圖于寺之西崗享年八十一受臘六十有八師慈

心濟物謙與下人行無緣飾言不覆藏談劇有味
使人懽然不倦愛而敬之平生居處未嘗煖席所
至惟以闡敷宗教爲己任至於作爲倡句圓轉尖
新皆有發明警悟後學師之行己之大略如是予
嘗受法乳之恩無以爲報况上有命俾文於樂石
敢以辭語蕪譎爲辭茲因泚筆而銘之曰

百億刹外有一梵宮不著精彩八面玲瓏祖祖常
住匝地清風西乾中夏洎于海東品日倡演開寶
藏鍵惟炤鑑覺相繼大闡絳茜青藍我師丕顯甘
露瑞徵鍾自睭善法器旣誕悲智常滿千睭北面

一時右袒謙與接物席未常煖跡雖却行名固先
欵朝野并推爲王者師萬乘屈尊摠衣丐慈弓墮
鼎水日昇咸池兩朝作範福利旁施妙用縱橫人
天所宗法雨旣足龍卧卧龍攀鱗沐潤學者雲從
年至九九晦影藏蹤臨程浩歌其曲如何白雲空
濶一鳥飛過火中浴了鵠塔嗟峨靈光萬古炤破
山河

正浦先生文集卷之三

正浦先生文集卷之三



國家圖書館, NATIONAL CENTRAL LIBRARY, TAIWAN, R.O.C.

附

年譜

十六世孫弘普編次

公諱坵字次山初諱百鎰姓金氏系出扶寧即今

之扶安縣

宋寧宗嘉定四年高麗熙宗七年辛未公生

五年高麗康宗元年壬申公二歲

六年康宗二年癸酉公三歲

七年高麗高宗元年甲戌公四歲

八年高宗二年乙亥公五歲

九年高宗三年丙子公六歲

十年高宗四年丁丑公七歲

十一年高宗五年戊寅公八歲

十二年高宗六年己卯公九歲

十三年高宗七年庚辰公十歲

十四年高宗八年辛巳公十一歲

十五年高宗九年壬午公十二歲

四月丙申登國學進士傳衣鉢啓所謂年遇巫

均齒屆危宿之躔而得登名於造士賦及六韻元年置國子監試即進士試也試以南省賦又殺宗十韻詩厥後或稱生成均試或稱南省賦經義其元年置陞補試即生負試也試以詩賦經義其或得參陞補試也造士者必是得參國子監試

儕輩無居右者皆以壯元期之出麗史列傳

十六年高宗十年癸未公十三歲

十七年高宗十一年甲申公十四歲

理宗寶慶元年高宗十二年乙酉公十五歲

二年高宗十三年丙戌公十六歲

三年高宗十四年丁亥公十七歲

紹定元年高宗十五年戊子公十八歲

二年高宗十六年己丑公十九歲

三年高宗十七年庚寅公二十歲

四年高宗十八年辛卯公二十一歲

五年高宗十壬辰二公二十

五月辛丑登文科第知貢舉文振榭下第二人及

不置第一以已亦為第二人語和范傳衣故事

慰藉之公作長啓以謝駢儷精切出人意料右

出麗史列傳○金良鏡改名仁鏡○文順公李

奎報曰繼我秉文衡者有學諭崔滋而及第金

坵其次也右出崔滋傳公既釋褐不汲汲於仕

及東國通鑑東國史略

進讀書求志

六年高宗二癸巳三公二十

端平元年高宗二甲午四公二十

出判濟州初補世累疏有司宰臣崔怡重其才

營救不得改濟州判官右出麗史列傳○公在

濟州時文清公崔滋為副使人有自京來報科

勇賦題云恭孝公據嶠函之固囊括四海滋謂

公曰此題難賦試為我著之公談笑自如亡何

索筆立書文無加點滋歎服語其子曰此詩賦

之準繩汝謹藏之右出麗史列傳○濟州地多

鹿石乾燥素無水田惟麥豆粟生之牛馬羶

以蚕食百姓苦之公莅官即聞民之疾苦聚石

等垣為界民多便之至今賴之右出東文鑑耽

誌羅

在濟州

二年高宗二乙未五公二十

在濟州

三年高宗二丙申六公二十

嘉熙元年高宗二丁酉七公二十

在濟州

二年高宗二年戊戌公二十

在濟州

三年高宗二年己亥公二十

考滿八拜直翰林院

四年高宗二年庚子公三十

以權直翰林充書狀官如蒙古有北征錄及詩

四首詩載文集右出列傳及東文選

淳祐元年高宗二年辛丑公三十

還在翰院

二年高宗二年壬寅公三十

在翰院

三年高宗三年癸卯公三十

在翰院

四年高宗三年甲辰公三十

在翰院

五年高宗三年乙巳公三十

在翰院

六年高宗三年丙午公三十

在翰院

七年 高宗三十四年 丁未 公三十七歲

由堂後除閣門祗候遷國學直講時權臣崔沆

新雕圓覺經令公跋之公不許作詩嘲之 詩見文集

沆怒曰謂我緘口耶遂左遷 當時舉國崇信佛

之場沆以怡之子忠獻之孫上法下奔走要福

主生殺與奪惟其所欲小有不如意者必擠陷

之公自是杜門斂跡以終崔沆之世

坎珂十餘年右出列傳及麗史世家

八年 高宗三十五年 戊申 公三十八歲

九年 高宗三十六年 己酉 公三十九歲

十年 高宗三十七年 庚戌 公四十歲

十一年 高宗三十八年 辛亥 公四十一歲

十二年 高宗三十九年 壬子 公四十二歲

寶祐元年 高宗四十年 癸丑 公四十三歲

二年 高宗四十一年 甲寅 公四十四歲

三年 高宗四十二年 乙卯 公四十五歲

四年 高宗四十三年 丙辰 公四十六歲

五年 高宗四十四年 丁巳 公四十七歲

始拜翰院知制誥 閏四月丁亥崔沆死公至是出仕

六年 高宗四十五年 戊午 公四十八歲

七年 高宗四十六年 己未 公四十九歲

景定元年 高麗元年 庚申 公五十歲

二年元宗二年辛酉公五十歲

三年元宗三年壬戌公五十歲

四年元宗四年癸亥公五十歲

十二月辛酉平章事李藏用門下省事柳璣上

書薦公吏部侍郎出麗史世家東國通鑑同月丙寅拜右

諫議大夫兼中大夫國子祭酒翰林侍講學士

知制誥上表辭表見文集王重其才特批不允曰稟

東壁之精擅西京之手又曰頃者蒙主詔書至

有辭旨懇款之語非爾所製之表情文曲盡感

動上朝則曷以臻此哉出麗史世家

五年元宗五年甲子公四十五歲

五月承命與大將軍趙文柱等造假闕於三郎

城神泥洞是月庚辰蒙主遣使來徵王入朝已

表請俟秋八朝於是時議皆持疑中郎將白勝

賢因參政金俊葵曰三郎城神泥洞造假闕則

可寢親朝三韓變為震朝大國來朝王信之命

公及大將軍趙文柱將軍宋松禮白勝賢等創

造假闕出東國通鑑

慶宗咸淳元年元宗六年乙丑公五十歲

二年元宗七年丙寅公六十歲

三年元宗八年丁卯公七十歲

差監試試負上表辭不獲遂上謝表取李繪等

出麗史 十月壬午兼修撰官修三朝實錄時與

國史李藏用同修國史柳璣修撰官許珙

四年元宗 戊辰八歲

五年元宗 己巳九歲

拜大司成○世子賜宴上箋謝好於是世子向學

公與祭酒李松縉等唱和有龍樓集行于世時

世子賜宴致慰公上箋以謝宴出麗史世家麗

史提綱東 為林衍所証與柳璣將被流貶以掌

詞命特宥之初公與平章事柳璣禮部侍郎朱

金俊也璣謂公曰頃間有衛社者今見其人皆

羣小也初璣與林衍及金俊等誅權臣崔瑠高

宗朝賜衛社羣小者蓋指林衍也又論古少

其曰衛社羣小者蓋指林衍也又論古少

當世窳寺之弊宦官金鏡譖于上怨望上召公

切責曰汝交結柳璣憑藉經史詐論國事予欲

罪之以其掌詞命故特宥之慎勿復爾遂流璣

等于黑山島出麗史提綱東史會綱東國通鑑

及柳璣傳十二月甲申公及尹君正拜左右僕

射出麗史世家○麗初置廣評省摠領百官又

射置侍中侍郎後改尚書省置尚書令左右僕

射忠烈朝并于中書門為

僉議府今之議政府也

六年元宗 庚午十歲

拜樞密院副使政堂文學出列

七年元宗 辛未十一歲

進拜吏部尚書○遣子汝孟隨世子八元六月

忠列王以世子八元質于元公之子汝孟以翰林

學士隨行為世子講婚於元朝周旋四載多有

勲勞矣○按麗史世家已交遣世子誣入質于
蒙古尚書右丞宋瑛軍器監薛公儉戶部郎中
金樞等二十人從之命樞院副使李昌慶調護
其行表奏云自臣至于輔相欲令子弟相速入
侍而先遣世子與衣冠入泐曾二十人衙內職負
百人進詣公之子汝孟入於二十人抄選中

八年元宗十壬申公六十

九年元宗十癸酉公六十

八月劾康允紹時上率羣臣賀聖節達魯花赤
及紹亦率其黨胡服直入自比容使見王不拜
敢詰公劾之甚力達魯花赤怒曰允紹先開剝
遵上國之禮而反劾耶將危之或以告公曰吾
寧獲譴豈可不劾此奴耶蓋允紹本新安公家
奴也解蒙古語以茲黠得幸於元宗既而得罪
不自安嘗私入元開剝而還自比客使阿附達
魯花赤洪恭丘謀害本國者也出列傳及東國

通鑑東史會綱十月甲寅以叅知政事差知貢舉上表

辭不獲進表見文集○時公與同知貢舉李顥取

第○舊制試日承宣奉御印至試院同知貢舉
庭迎知貢舉面北立堂上避位待之矣至是洪
子藩以承宣奉御印將往試院奏曰承宣奉御
寶至貢院知貢舉或下階以迎或否今從何禮
上曰有寶宜下階子藩至貢院詰之曰余奉御
寶來知貢舉不庭迎余不敢入公曰承宣詣宰
相宰相坐而待之今乃起避尚過禮况庭迎乎
子藩曰已有承命而來公不得已遂下階出麗
史選舉誌及建議試叅外文臣時公建言後生
洪子藩傳表箋未合律格宜試叅外文臣所製賞
其能者上允之而事竟不行出列傳

十年元宗十甲戌公六十

八月戊辰子翰林學士汝孟隨世子還自元月

丙戌忠烈王得尚元世祖女安平公主六月癸亥元宗薨八月戊辰忠烈王東還即祚賜汝孟以丹書其畧曰粵辛未歲寡人為安社稷入侍天庭備嘗險阻之時爾國耳忘家勤勞隨從至于四年終始一心輔導寡人請婚○天戚復整三韓流榮萬國朕嘉其功而記其勞○丹書錄券板畱在道東書院

恭宗德祐元年高麗忠烈王元年乙亥公六十歲

冬改知僉議府替成事兼寶文閣大學士尋遷

叅文學事判版圖司事出列傳及栗谷集

端宗景炎元年忠烈王二年丙子公六十歲

建議置通文館以杜舌人姦私之弊時舌人多起微賤傳

語之間多不以實或懷姦濟私五月公以叅文學事獻議置通文館令禁內學官叅列年少

臣習漢語蓋禁內學官即秘書史館翰林寶文閣御書同文院也并式目都兵馬迎送謂之禁內九官出麗史百官志東史

却石秣天衢請賦

迎春詩春有投匿名書於達魯花赤石秣天衢

公主且誣告諸大臣謀不執公主乃囚宮主天衢亦囚首相雜問之天衢忽言春期已近諸君宜賦迎春詩公愀然不賦曰王妃首相俱在縲

二年忠烈王丁丑公六十歲

正月甲午拜世子貳師時以金方慶為師柳璫

祿道李汾禧韓康為調護皆極一時五月壬寅

公兼同修國史與監修國史柳璫修國史元傳

修高宗實錄出麗史世家

帝昺祥興元年

忠烈王四年

戊寅

公六十歲

二月丁卯復拜叅文學事

出麗史世家

○九月丁未

卒享年六十八王曰某曾拜平章事吊誄宜以

平章書之官庇葬事謚文貞公○公性悃愾無

華寡言語至論國事切直無所避善屬文掌詞

命上國徵詰殆無虛歲公久掌撰表遇事措辭

皆中於理以此多獲允俞元翰林學士王鶚每

見表詞必稱羨恨不得見其面

出列傳及東國通鑑麗史提綱

東史會綱東國史畧

○公初卜居于扶安縣東仙鶴洞又

築室於縣西邊山海上名之以知止浦逍遙兩

處琴書自老訓誨後學嚴立課程人才蔚興○

墓在邊山知止浦茅寺北沙浦東暝洞良坐之

原○稼亭李穀曰山人悟生黃山江樓詩落句

云卧聞漁父軸轡語走馬紅塵非我徒東坡漁

父詞云江頭騎馬是官人借我孤舟南渡坡如

龍眠畫李廣奪胡兒弓引滿不發悟生畫作射

中追騎矣悟生之登科有詩名出家號鷲峯賦

落梨花云玉龍百萬爭珠日海底陽侯拾敗鱗

暗向春風花市賣東君容易散紅塵正所謂村

學中詩也金文貞坵亦有之飛舞翩翩去却回

倒吹還欲上枝開無端一片黏絲網時見蜘蛛
捕蝶來作家手段固自不同○又曰元世祖平
阿里孛哥金文貞坵賀表云赫斯怒爰整旅揚
周家黃鉞白旄愛克威允罔功剗曲沃素衣朱
襪翰林五百一學士屢稱其工世祖旣一四海
登用儒雅憲章文物皆復中華之舊文貞作表
得一句云天下豈馬上理乎更闡文明之化三
改其對終莫噤予追對曰江南如囊中物耳方
臻混一之期天下豈馬上理乎更闡文明之化
出海東野語 ○北軒金春澤題金秀才冊後曰尚章

敦牂歲金秀才自湖南來訪余於寂寞之濱袖
出數首詩以爲質以書爲質蓋古之禮也秀才
其好禮者歟不然何以詩爲也余乃展而讀之
其一卽麗朝名臣金文貞公詩也其一卽成冲
菴詩也文貞公於吾亦外家先世也文章德業
冠吾東方而余獨不得見其詩爲恨于今視之
可謂幸矣詩軸中有樂章一首余乃三歎之餘
想像其盛德光輝於百代之下則其所以北極
風雲之會東方日月之明滿國笙歌之吟趨朝
劍佩之詠蓋莫非形容當世太平之像則諷諷

乎泱泱乎吁亦盛矣若使季子觀之則孰不曰
大風也哉此不但爲騷壇墨客之翫而已政可
以聞於當世之大雅君子則安得不表章之也
余故書庸識哉以贈而因有所感焉余近來病
蟄山中甘作逸民石榻松窓人間遠矣林霏蘿
月塵寰隔矣了不聞當世之言則亦安知當世
之事也我未知北極風雲會歟東方日月明歟
滿國笙歌新喜呈歟劍佩趨朝太平賀歟今之
東方亦如古之所謂東方歟揄揚聖德以鳴當
世之盛有如文貞公者凡幾人歟身在山中下
聞山外之事予出而問於當世者如其所聞有
如吾所云云者其亦聞此山翁否乎感其來訪
之意旣以書與之又此贈言焉

皇明嘉靖十三年

我中宗大

王三十九年甲午士林追慕遺

烈立祠于本縣之南五里許道東△我

肅宗大王二十九年癸未公之後昆壽星適於錦
城朴判書泰恒家見有短琴琴之裏面有字諱
標識的是公之琴故推來修藏于齋室而有時
自鳴爲雲仍愛賞寓慕之資歲辛卯瑟工貪其
精妙乘夜偷去跟而推得則去柱毀絃幻以瑟

材壽星之孫東灝欲為修葺付于高山柳某未
及始功忽於壬子失于灰燼可勝痛哉

附

神道碑文

高麗平章事文貞金公神道碑銘

一日金佐郎東稷與其弟東灝自湖南來以其先祖文貞公墓隧之文來托不佞惟其世遠跡昧有難攷徵及見附錄石潭李先生撰公後孫家文字有曰扶安維金累善積功顯顯清譽秩秩家法此是先生推本溯源之論則其顯顯之譽秩秩之法盖由文貞積累之德也以是爲銘足矣仍以列傳及家牒所載者參互而序次焉公諱坵字次山系

出新羅國姓諱春扶寧府院君卽公高祖也曾祖諱仁順隱德不仕祖諱作新右僕射兼吏部尚書扶寧君考諱宜閤門祗候右僕射妣羅州金氏以高麗熙宗七年辛未生公自幼容貌端重氣度宏濶四五歲多通經史又善屬詩文時人稱神童年十二登造士選二十二擢文科第二知貢舉金仁鏡恨不置于魁以已科名亦居第二引和范傳衣故事慰藉之公作啓以謝之有曰魯公出魯公門喜襲傳衣之跡李文順奎報語人曰繼我秉文衡者必此人初補定遠府司錄爲同縣人黃閣寶所

搆捏改濟州通判時崔文清滋爲濟副使見公詞賦謂其子曰此可作詩賦準繩濟之田舊無疆畔強暴之類有因緣兼拜者且多鹿馬害穀之患民病之公遂斲石爲垣正其經界防其蹂躪民至今賴之攷滿八拜翰林庚子充書狀赴蒙古有北征錄行于世在翰院凡八歲遷國學直講時儒道晦塞佛法縱橫權臣崔沆世專國柄小拂其意立擠之沆雕佛經費公跋之公詩以譏之曰蜂歌蝶舞百花新摠是華藏藏裏玆終日啾啾說圓覺不如緘口過殘春沆大怒曰謂我緘口耶遂左遷元宗

山浦集卷三
癸亥蒙主怒本國嘖言頻繁公撰修表咨詞致懇
到蒙主感悟至有賞賚平章事李藏用門下事柳
璈交薦公擢拜左諫議兼翰林學士知制誥公上
表力辭王重公詞翰特批曰稟東壁之精擅西京
之手丁卯兼修撰官與李藏用等修神熙康三朝
寶錄已巳拜大司成與柳璈論林衍等羣小之罪
闍寺輩用事之弊宦者金鏡濶銜之誣公怨國元
宗切責公將罪之以掌國詞命特原之時王世子
好學與公唱酬有龍樓集冬陞左僕射歷樞密院
副使政堂文學吏部尚書兼寶文閣大學士癸酉

秋王率羣臣賀節內豎康允紹阿附達魯花赤胡
服直入自比客使見王不拜公劾之達魯花赤大
怒公終不動時論韙之冬以叅知政事除知貢舉
取鄭賢佐等士林咸服其得人公建言後生決科
全拋文字著述甚魯莽請試製叅下文臣賞其能
者王允之甲戌陞拜平章事乙亥改僉議府贊成
事判版圖司事丙子公言舌人皆微賤庸瑣傳語
多不以實或懷姦濟私貽害朝家請置通文館令
禁內學館叅外年少者誦習漢語俾正譯語之失
丁丑拜世子貳師與柳璈等同修高宗實錄戊寅

遷叅文學事是年九月丁未考終享年六十八王命吊誄以平章御書之謚曰文貞官庇葬事墓在扶安邊山知止浦艮坐之原配慶州崔氏禮賓卿珩之女生三男一女男長宗孟典校副令女適贊成事鄭階男叔孟西都監判官男汝孟刑部尚書兼文翰學士庶男曰承印大司成江陵按撫使今者年代已逖後世雲仍不能盡錄而其中有有行誼經顯職者如汝孟之子恪吏部尚書孫之問典儀曾孫龍壽密直副使其後直孫弘文館博士錫弘已卯名賢號甕泉錫弼校理瑞星副應教

海監司號雲江泰福號竟并壬辰倡義守靈光城有守城錄其子湍以學行薦爲縣監甲子亂倡義有募義錄曰東稷曰東灑卽請文者而湍之五代孫也公稟性悃愾無華端方有度釋褐以後不汲汲於進取與安文成公裕爲道義交講磨經傳以興學爲務其所抱負非尋常俗儒之比故立朝言議實多可觀斥林衍之專擅而憂時嫉惡之心著矣効允紹之猖狂而尊主遏夷之義凜矣元學士王鷄見公表文恨不見面則公之文章可謂華國矣後來諸賢之稱道甚盛竒高峯大升是經術君

子而以德行推公徐四佳居正卽文苑宗匠而以傑然稱公觀於此可知公卓然爲前代之名臣矣不佞之最所景歎者勝國之時竺教肆行上下奔波以求福田利益彼崔沆之巧文媚佛也公獨正色斥之雖死靡悔其闢異扶正之功實有吾東方無窮之惠矣公卜居于縣之仙鶴洞晚又築室于邊山海上名之以知止浦休退之暇琴書自娛以訓誨後學爲已任嚴立課程有育才之效歿後邑之章甫立祠于縣之道東以享之其遺風餘韻至今未沫蓋公子孫多以德行節義著稱或配侑公

祠或別祭鄉社孰謂醴泉之無源耶公之墓經亂失絕久矣我肅廟戊午後裔弘遠葬其父得公墓誌匿不出丙申弘遠死事始發戊戌諸子孫訟辨遂去逼葬者公之地域於是復顯遂封而表之不佞於公亦彌甥也因賢孫之托不避僭猥換次如右系之以銘銘曰

允矣文貞天賦英特前代第一少日詞藻華聞藹蔚前輩推轂立朝言議不饒貴強舉世爭仰遠中壽螫十載沉屈曾無悔色歷事累朝忠勤案篤終始一節濶關左道力扶儒教其功尤大餘慶綿延

後承多賢天道即然余用作銘樹之墓徑行者致敬

資憲大夫議政府左叅贊兼弘文館提學 世孫

左副賓客鄭 棠撰

資憲大夫工曹判書兼五衛都摠府都摠管李敏

輔篆

嘉善大夫行副司直兼五衛都摠府副摠管曹允

亨書

墓前碣退漁齋光山金鎮商書

止浦集卷之三

余曩監扶風縣，即止

浦金文貞公所居之邦

也上官訖首謁公所亭

道東之院論問公遺集

蓋世久而歷兵燹存者

無幾僅有詩文若干篇
及公十六世孫弘哲所
編年譜一卷諸生方謀
付梓而未能言越二年
冬役始成公之後進士

宗澤問跋於余，乃獲
觀是集最先而竊者所
感慕不已者服胡之勳
媚佛之譏事，余著寫時
君之廢名人之獎文章

炳有國史也乘國已蔚
然可播而鄭太史之銘
碑宋貳師之弁峯又盡
余何敢贅為公學退
居知止浦因以自號知

心者至善之極致也斯
可見為學之大方而教
養子孫訓迪後學率以
是道之扶風賢士大夫
出於公之脚下者多則

宣其達祠而尊之曰止
浦先生也嗚呼公歿已
五万森餘而文章滄行
尚有不泯者存矣願公
邪教充斥二湖愈熾敗

滅倫藝甚於夷佛之害
而若使公當之其深惡
而痛斥必不啻若嚮者
已著之矣也為公之子
孫與後學者以公之院

為燕僕之所讀公之書
服公之行繼家聲襲送
風相與為勉而曷敢不
以公之心為心哉然則
是邦之有是說足彼之

有是集實有補於世教
而如余托名於末者如
亦与有榮也夫

上之元年辛酉彌甥安東
金麟淳謹跋

